

## Auslegung des Euangelij

er den kopff empor/die Saw aber vnter sich/tregt/ Denn er kan doch kein ander gedanken haben/denn so weit dieses leben gehet. Darumb ist es nicht wunder/ ob die Vernunfft daher klügelt/ Wie kan der Mensch schlaffen/ der keinen othem noch leben hat/ vnter der erden begraben ligt vnd verweset?

Wer es heisse/ wer hie wil Gottes Reich/ Krafft vnd werck lernen verstehen vnd erfahren/ der mus seinen verstand vnd sinne zuthun/ seine augen lerten/ vnd seine ohren fegen/ vnd hieher hören/ vnd sehen/ was Christus hie von sagt/ wie es fur im ist ausser diesem leben/ dahin vnser verstand/ sinn vnd gedanken nicht reichen mögen.

**J**e hörestu nu/ das Christus spricht/ das des Menschen sterben ist im nicht ein tod/ sondern ein schlaff/ Ja es ist fur im deren/ so vor vns bis auff diesen tag gelebt vnd begraben/ oder noch sollen begraben werden/ keiner nicht tod/ sondern alle so lebendig/ als die wir sehen fur vns stehen/ Denn er hat es beschlossen/ das sie alle sollen leben/ ja er hat schon jr leben in seinen henden.

**D**enn du must hie Christi gedanken vnd werck weit scheiden von diesem weltlichen ansehen/ gedanken vnd verstand/ wie ich gesagt habe/ Das du nicht in den viehischen blinden sinnen vnd gedanken bleibest/ wie der leib da ligt vnd verfaulet/ Sondern eiflich also gedenckest/ Das er ist der **HELV** aller Creaturen/ sie seien tod oder lebend/ Vnd all jr leben aus im fleusse/ vñ durch vnd in im bestehet/ das/ wo er es nicht erhielte/ so künde jr keines keinen augenblick leben.

Alle Menschen leben in der hand Christi.

**W**as er es doch on das teglich erhalten/ wenn wir leiblich schlaffen/ da der Mensch selbs seiner sinne vnd lebens nicht mechtig ist/ vnd nicht weis/ wie er in den schlaff sincket/ oder wider craus komet/ vnd also gar on sein wissen vnd zuthun das leben in im erhalten wird. Darumb ist es im nicht schwer/ auch zu der stunde/ so sich leib vnd seel scheidet/ des Menschen seel vnd geist in seinen henden zu halten/ vnd wider zu dem leibe zu bringen/ ob wir gleich nichts davon sehen noch fühlen/ ja ob auch der leib ganz verweset/ Denn wie er den othem des lebens vnd geist ausser dem leibe erhalten kan/ so kan er auch den leib aus

dem staub vnd puluer wider zusammen bringen.

**S**olches hat er beweiset mit diesem vnd der gleichen Exempel/ da er die/ welche warhafftig gestorben/ vnd die seele von dem leibe gescheiden/ mit einem wort wider auffweckt hat/ das man mus sagen/ das er auch/ da sie tod sind/ jr leben in seiner hand behelt/ Des wo er es nicht in seiner gewalt hetze/ so künde er es auch nicht wider geben.

**Z**um andern/ mustu auch in dieser sachen nicht rechnen vnd zelen/ wie weit leben vnd tod von einander ist/ oder wie viel jar dahin gehen/ das der leib im grabbe verweset/ vnd jmer einer nach dem andern dahin stirbet/ Sondern hie auch ander/ denn Menschen/ gedanken/ in Christo fassen/ wie es ausser dieser zeit vnd stunden gehet/ Denn er nicht die zeit also zeleit/ bey zehen/ hundert/ tausent jaren/ noch also nacheinander musset/ eines vor/ das ander nach/ wie wir in diesem leben thun müssen/ Sondern alles in ein augenblick fasset/ anfang/ mittel vnd ende des gangen menschlichen geschlechtes/ vnd aller zeit/ Vnd was wir nach der zeit ansehen vnd messen/ als ein seer lange aus gezogene messerschnur/ das sihet er alles/ als auff einem klemel zusammen gewunden/ Vnd also beide/ des letzten vnd ersten Menschen tod vnd leben/ im nicht mehr denn ein augenblick ist.

**A**lso sollen wir auch vnsern tod lernen recht ansehen/ damit wir nicht das far erschrecken/ wie der Vnglaube thut/ Das er ist warhafftig in Christo nicht ein tod/ sondern ein seiner/ süßer/ kurzer schlaff/ da wir aus diesem jamer/ der Sünde vnd des rechten Todes noc vnd angst/ vnd allem vnglück dieses lebens/ entledigt/ sicher vnd on alle sorge/ süß vnd sanfft einen kleinen augenblick ruggen sollen/ als in einem Zugebetlin/ bis die zeit kome/ das er vns mit allen seinen lieben Kindern/ zu seiner ewigen herrligkeit vnd freuden auffwecken vnd ruffen wird.

**D**enn weil es ein schlaff heisset/ so wissen wir/ das wir nicht darin bleiben/ sondern wider auffwachen/ vnd leben/ sollen/ Vnd die zeit/ so wir schlaffen/ vns selbs nicht lenger sein kan/ denn als weren wir erst jtz diese stunde eingeschlaffen/ Das wir auch werden vns selbs

müssen

Alle Menschen sind tod vnd verwesen ist fur Christo ein augenblick.

Der tod ein süßer schlaff in Christo.



müssen straffen/das wir vns fur solchem feinen schlaff in der todes stunde entsetzt oder geengstet haben / Vnd also in einem augenblick aus dem grab vnd verwesung lebendig / ganz gesund / frisch / mit reinem / hellem verklärtem leibe / vnserm HERRN vnd Heiland Christo in den wolcken entgegen komen.

Darumb sollen wir auch mit aller zuversicht vnd freuden / als vnserm trewen Heiland vnd Erlöser / vnser seel / leib vnd leben vertrauen vnd befehlen / Gleich wie wir on alle sorge in leiblichem schlaff vnd ruhe vnser leben im befehlen müssen / Gewis / das wir es nicht verlieren (wie es fur vnsern augen scheinet) sondern in seiner hand sicher vnd wol verwaret / sol erhalten vnd vns wider gegeben werden.

Wenn hie siehestu / das er mit der that beweiset / wie leicht es im ist / aus dem tod den Menschen zu erwecken vnd das leben wider zu geben / da er zu dem Meidlin komet / vnd sie allein bey der hand angreiffet vnd fasset / wie sonst jemand möchte einen schlaffenden auffwecken / vnd mit einem wort jr ruffet / Auff Meidlin / Vnd das Meidlin so bald sich auffrichtet / als were sie sonst aus dem schlaff geruffen / Vnd ist hie weder schlaff noch tod mehr / sondern fein wacker vnd frisch / Wie auch Lazarus aus seinem grabe gehet.

Siehe / also wird dem Glauben dis Wort Christi nicht ein gelechtes vnd torheit (wie dem andern hauffen der Klügler vnd Heiligen nach dem Gesetz / Welche doch jmer in furcht vnd schrecken fur dem Tod bleiben / mit eitel tods gedanken vnd wercken umbgehen) Sondern eine hohe weisheit / das von der tod vñ alle tods bilde verschlungen / vnd dafür eitel trost / freude vnd leben ergriffen wird. Vnd gewislich diesem Wort Christi mus die that vnd erfahrung folgen / vnd der Glaube seines Wortes / nicht kan feilen.

Vnd lasse dir dieses auch ein treffliche Alchimey vnd Meisterstück sein / das dir nicht kupffer oder bley zu gold machet / sondern den tod zum schlaff / dein grab zu einem sanfften Rugetetlin / die zeit von Abels tod an / bis an den Jungsten tag / zu einem kurzen stündlin machet / Welchs keine Creatur hat noch vermag / denn dieser Glaube in Christo /

Kanstu dieses auch glauben / das ist / Christi Wort lassen war sein / vnd nicht lassen straffen / so hastu schon auch beide / tod vnd tods kampff vberwunden / vnd daraus dir eine süsse ruhe gemacht.

Diesen trost gebe vns allenthalben die Schrifft / welche auch von dem tod der Heiligen also redet / das sie entschlaffen / vnd sich gesamlet zu iren Vetern / das ist / in diesem Glauben vnd trost in Christo / den Tod vberwunden / vnd der Auferstehung sampt den andern Heiligen / so vor inen gestorben / gewartet.

Daher auch von alters die Christen (on zweinel von den Aposteln oder iren Jüngern) die weise gehabt / das sie ire begrebnis ehrlich gehalten / vnd bey einander gehabt / wo sie gekund haben / vnd die selbe genennet / nicht Grabsteine oder Todtenhöfe / sondern Coemeteria / Dormitoria / Schlafheuser / daher auch solcher namen bis auff vns blieben / Vnd wir Deudtschen von alters solche begrebnis nennen Gottes acker / nach der weise / wie S. Paulus 1. Corin. 15. redet / Es wird geseet ein natürlicher leib etc. Den das wir jtz Kirchhöfe heissen / das sind ersilich nicht begrebnis gewesen etc. Siehe / das ist die lere vnd trost dieses Euangelij.

Witter ist auch hie furgebilldet / als in einem Gemelde / bei der / in dem blutflüssigem Weibe / vñ in dem Meidlin / wie es gehet in dem Regiment / da man die gewissen mit dem Gesetz regieren wil / vnd Christus nicht erkand wird. Denn da sind zweierley Leute / Ein teil sind die kranken / armen / blöden gewissen / so ire heimliche not der sünden fülen / vnd des Gesetzes vrtail vnd fluch / das ist / Gottes zorn vber sich gegangen / wolten der selben gerne los sein / suchen hülffe vnd rat bey allen Erzten / wenden daran alle jr vermögen / leib vnd leben / Vnd doch alles nichts hilfft / bessert noch tröstet / sondern nur erger wird / das sie müssen zu letzt gar verzweineln / vnd sich des tods erwegen / bis so lang Christus mit seinem Euangelio komet.

DAs haben bisher eigentlich vñ eben also / viel gutherziger Leute vnter dem Bapsthum erfahren / so mit ernst inen vorgenommen from zu werden / alles gethan / wie man sie nur weiset vnd lerete / vnd nur dauon engstiger / verzagter gewissen worden /

Die Heiligen in Christo entschlaffen.

Der Christen begrebnis / jr Schlafkammer vnd Rugetetlin.

Heimliche deutung des Euangelij.

Engstige gewissen vnter dem Gesetz.

Das Meidlin mit einem wort vom tode wecket.

Glaube machet aus dem Tod einen süßen schlaff.



## Auslegung des Euangelij

worden / vnd fur furcht vnd schrecken des Tods vnd Jüngsten tags gerne zur Welt aus gelauffen weren. Das war die frucht aller lere / wo sie am besten ist / ausser dem Erkenntnis Christi.

**D**er ander hauffe / wie die Tochterlin des Obersten / ist vere / die on Gesetz sind (es seien Jüden oder Heiden) das ist / frey vnd sicher dahin gehen / fülen nicht des Gesetzes schrecken / meinen / sie sein wol daran / bis so lang sie plötzlich getroffen werden / vnd gar dahin sterben. Wie S. Paulus von jm selbs sagt / Rom. 7. das er auch et wo on Gesetz gelebt / aber hernach durch das Gesetz die Sünde lebendig worden / vnd in gerödet habe etc.

Durchs Euangelium empfaben blöde gewissen freud vnd leben.

Als nu diesen beiden aus irer not vnd tod geholffen werde / da ist kein rat noch hülffe zu / denn das Christus erkand / vnd seine tröstliche lebendige stimme des Euangelij gehört werde / welche hat die krafft / Sünd vnd Tod zu vertreiben / vnd ewiglich dem gewissen trost / freude vnd leben zu geben / wo sie mit gלבubigem hertzen gefasset wird.

Was ist hierin klar gezeigt der Artickel / das wir on vnser verdienst / Gracis / allein durch Glauben / gerecht vnd selig / das ist / von Sünden vnd Tod erlöset werden / Denn ja das arme Weiblin nichts fur Christo bringet / on eitel grosse vnwürdigkeit / das sie sich auch

schemen mus / ja voller furcht vnd schrecken wird / da sie offenbar mus werden / So ist viel weniger bey des Obersten Tochterlin / einige eigen würdigkeit vnd verdienst / weil sie da ligt in tod geworffen / vnd gar on leben vnd werck ist.

**S**omma / Es mus hie sein das bekentnis / das wir bey vns nichts haben noch vermögen zu thun vnd leben / das Gott gefalle / vnd vns zu gnaden vnd leben bringen möge / Sondern sein lauter blosser gnade vns geschencket. Dar nach aber / wo wir vergebung der sünden / trost vnd leben haben / da lasse vns denn auch anfahen / gute werck zu leren vnd thun / Gleich wie das Weib / nu es gesund / vnd das Weidlin / nu es lebendig worden / auch eines gesunden vnd lebendigen werck geihan hat / Denn also haben wir nu in Christo die krafft / das wir nu können nach Gottes willen leben / vnd wissen / das jm vnser angefangen werck vnd leben in Christo wol gefeller.

Was hie weiter zu sagen were / Wie Christus seine werck vnd wunder in seiner Kirchen thut / daran sich die fruchte des Euangelij beweisen / doch heimlich vnd verborgen (wie er mit diesem Weiblin vnd Weidlin geihan) das es die Welt nicht sehen mus / das würde jzt zu lang.

## Am XXV. Sonntag nach

Trinitatis / Epistel / 1. Thessa. 4.



**W**ir wollen euch aber / lieben Brüder / nicht verhalten / von denen die da schlaffen / Auff das jr nicht trawrig seid / wie die andern / die keine Hoffnung haben. Denn so wir glauben / das Ihesus gestorben vnd auffgestanden ist / So wird Gott

auch / die da entschlaffen sind durch Ihesum / mit jm führen.

Denn das sagen wir euch / als ein wort des HERREN / Das wir / die wir leben vnd oberleben in der Zukunft des HERREN / werden denen nicht vor komen die da schlaffen. Denn er selbs der HERRE wird mit einem Feldgeschrey vnd stimme des Erkengels / Vnd mit der Posaunen Gottes ernder komen vom Himel / vnd die Todten in Christo werden auffstehen zu erst. Dar nach



nach wir / die wir leben vnd über-  
bleiben / werden zu gleich mit den  
selbigen hingezuckt werden in den  
Wolcken / dem HERN entgegen  
in der Lufft / vnd werden also bey  
dem HERN sein alle zeit. So  
tröstet euch nu mit diesen worten  
vnternander.

**D**ies stück schreibt S. Paulus  
zur tröstung der Christen / so dar-  
ob bekümmert waren / wie es zu

gehen würde in der Auferstehung der  
Todten / ob sie auch alle mit einander  
würden auferstehen / Item ob die / so  
den Jüngsten tag erleben solten / wür-  
den ehe zu Christo komen weder die an-  
dern etc. Hierauff antwortet Inen S.  
Paulus / vnd sagt / wie Christus alle sei-  
ne Guebigen / so je gelebt / zu gleich wer-  
de zu samen zu sich nemen etc. Aber dies  
se Epistel findestu reichlich ausgelegt /  
in den Anlegungen vber etliche  
Episteln / sonderlich ausgan-  
gen / da magstu sie  
suchen.

# Am XXV. Sonntag nach

Trinitatis / Euangelium Matth. 24.



Ein jr nu  
sehen wer-  
det / den Gre-  
wel der ver-  
wüstunge /  
dauon ges-  
sagt ist dur-  
ch den Pros-  
pheten Daniel / das er siehet an der  
heiligen Stette (Wer das liest /  
der mercke drauff) Als dem sihe  
auff die Berge / wer im Jüdischen  
lande ist. Vnd wer auff dem Dach  
ist / der steige nicht ernider etwas  
aus seinem Hause zu holen. Vnd  
wer auff dem Felde ist / der lere  
Pp liij nicht



## Auslegung des Euangelij

nicht umb/seine Kleider zu holen. Beh aber den Schwangern und Scugern zu der zeit. Bittet aber das etwer Flucht nicht geschehe im Winter / oder am Sabbath.

Denn es wird als denn ein gros trübsal sein / als nicht gewesen ist von anfang der Welt / bis her / vnd als auch nicht werden wird. Vnd wo diese tage nicht würden verkürzt / so würde kein Mensch selig / Aber umb der Auserweletē willen / werden die Tage verkürzt.

Ed als denn jemand zu euch wird sagen / Siehe / hie ist Christus / oder da / So solt irs nicht glauben. Denn es werden falsche Christi vnd falsche Propheten auffstehen / vnd grosse Zeichen vnd Wunder thun / das verführet werden in den irthum (wo es möglich were) auch die Auserweleten. Siehe / Ich habs euch zu vor gesagt.

Drumb / wenn sie zu euch sagen werden / Siehe / Er ist in der Wüsten / so gehet nicht hinaus / Siehe / Er ist in der Kamer / so glaubet nicht. Denn gleich wie der Blitz ausgehet vom auffgang / vnd scheint bis zum Nidergang / Also wird auch sein die zukunfft des menschen Söns. Wo aber ein Afs ist / da sammeln sich die Adler.

**I**n diesem Capitel / ist beschrieben der ausgang vnd das ende beider Reich / des Jüdenhums vnd auch der ganzen Welt. Aber die zween Euangelisten / Mattheus vnd Marcus / werffen die beide in einander / halten nicht die ordenung / die Lucas gehalten hat / Denn sie nicht weiter sehen / denn das sie die wort Christi geben vnd erzelen / bekümmern sich nicht damit / was vor oder nach geredt sey / Lucas aber hat es

klarlicher vnd ordentlicher beschriebens / vnd erzelet diese Rede zwey mal / Einest kürzlich am Vennzehenden Capitel / da er von der zerstörung der Jüden zu Jerusalem sagt / Darnach am ein vnd zwentzigsten von diesen beide nach einander.

So wisse nu / das Mattheus hie in einander wickelt / vnd zugleich fasset das ende / beide des Jüdischen volcks vnd der Welt / Kochet es also in einen brey / Wileu es aber verstehen / so mustu die beide von einander sondern / vnd iglichs auff sein ende zihen / welchs eigentlich von Jüden / oder der ganzen Welt geredt sey / Das wollen wir sehen.

Erstlich sehet Christus in diesem Capitel an zu weissagen von des Jüdischen Reichs endlicher zerstörung / welche die Jüden gar nicht glibten / noch sich versahen / Denn das Volk durch treffliche grosse zeichen vnd zusagung Gottes / so er den lieben Vetern beweiset vnd gethan hatte / eingesetzt war / des gleichen nie keinem Volk auff erden widerfahren war / Derhalben sie gang steiff darauff stunden vnd sich verliessen / hielten dafür / sie würden ewig bleiben / wie sie auch noch heutiges tages meinen / ir Reich sey nicht aufflösch / sondern ein wenig gefallen / Vnd solle noch wider auffgerichtet werden / Können aus dem sin nicht erretzt / das es gar mit inen ans sey.

Drumb hat nu Gott zu vor / neben den wundern / auch durch klare / helde sprüche der Propheten verkündigen lassen / das dis Reich ein ende solt haben / vnd Gott auff heben wolt / das ewerliche Regiment im Gesetz / Speise / Opffern etc. vnd ein anders einsetzen / das da ewig werete / wie der Engel sagte zu der Jungfrawen von Christo / Luc 24. Er wird ein König sein / vber das haus Jacob / vnd seines Königreichs wird kein ende sein.

Niter den selbigen sprächen von des Jüdenhums ende / ist farnemlich einer / den Christus hie einfüret / des Propheten Daniel / von dem wüsten Grewel / der da stehet / wo er nicht stehen sol / Denn er eben vom Jüdischen Volk geredt ist / vnd spricht daselbs also. Mercke vnd vernims / von dem an / wenn der befehl angehet / das Jerusalem wider soll gebawet werden / bis auff Christum den Fürsten / sind sieben wochen / vnd zwo vnd sechzig wochen /

*Jude glaubten nicht das ir reich zerstört solt werden.*

*Wessagung von der zerstörung des Jüdischen Reichs.*

*Dani. 9. 7. wochen vnd 62. wochen / sind zu hauff 70. wochen / machen 490. jar. 7. 30.*

*Ordnung dieser predigt Christi.*



wochen / Vnd vber zwo vnd sechzig wo-  
chen / wird man den Messias ausrotten /  
vñ die werden nicht sein seien. Die Stad  
aber vnd das heilige / wird verderben  
das volck des Fürsten der Kommen wird /  
vnd sie / wird mit vngestüm ir ende ne-  
men / Vnd wenn der streit ein ende hat /  
wird da bleiben ein gewisse verwüstung.  
Er wird aber den Bund bestetigen vnt-  
er vielen in einer woche / vnd in der  
helfft der woche wird auff hören opf-  
fer vnd speisopffer. Vnd bey den Flä-  
geln werden stehen greuel der verwüs-  
tung / Vnd ist beschlossen / das bis ans  
enderber die verwüstung triessen wird.

(Flügel)  
das ist / da  
die Cheru-  
bin stehen  
im Tempel.

Der Prophet Daniel hette gerne eine  
gewisse zeit gewußt / wenn das gesche-  
hen würde / kund es aber nicht erlangen.  
Denn wiewol der Engel ein bestimpte  
zeit deutet / war es doch zu finster / das  
der Prophet nicht verstehen kunde. Dar-  
umb er auch zuor sagt / Aufss legt / oder  
zur letzten zeit / wirstu das alles sehen /  
das ist / deine Prophecey / die dir offens-  
bart wird / sol am ende der welt ange-  
hen.

Wenn da Christus das Euangelium  
lies angehen / durch sich vnd die Apo-  
steln / hat es gewehret drey oder vierd-  
halb jar / das es fast an die rechnung Da-  
nielis Kommet (nemlich / 490. jar) dar-  
umb er auch sagt / Christus sol eine hale-  
be woche weilen / in der sol das teglich  
opffer auff hören / das ist / der Jüden  
priestertum vnd Regiment sol ein en-  
de haben / Welchs alles geschehen ist / die  
vierdhalb jar / da Christus gepredigt  
hat / vnd fast in vier jaren nach Christo  
volendet / in welchen das Euangelium  
am aller stercksten gegangen ist / sonder-  
lich im Jüdischen lande / durch die Apo-  
steln / Das also eine ganze woche / das ist /  
sieben jar / der bund (wie Daniel sagt)  
bestetigt / das ist / das Euangelium den  
Jüden gepredigt ist / Davon anderswo  
geschrieben.

Jüdisch  
reich hat  
sich mit  
Christi Ze-  
melfort ge-  
endet.

DAnu die zeit da war / vnd eine neue  
predigt angien / musse auch ein new  
Reich angehen / das ist / darinne Chris-  
tus durchs Wort vnd glauben geistlich  
regiret in vnsern herzen / Solc das nu  
fort gehen / so musse jenes vrlaub haben /  
nicht mehr gelten vñ auff hören. Das  
ist des Propheten weissagung ein stück /  
darauff Christus deutet.

Das ander ist von dem wüsten Gre-

wel / Da spricht nu Christus / Wenn jr  
den selben im Tempel stehen sehen wer-  
det / denn sehet drauff (wil er sagen)  
denn das sol ein gewis zeichen sein aus  
der Prophecey Danielis / das dis Reich  
nu ein ende habe / Vnd lasset euch nicht  
irre machen / das die Jüden oder auch  
schwache Christen meinen / es solle nicht  
verwüstet werden.

Der greuel  
in dem Tem-  
pel.

Der Greuel aber / dauon Daniel  
schreibt / ist / das der Keiser Caius (wie  
die Historien anzeigen) sein bilde in Tem-  
pel zu Jerusalem setzet für einen Ab-  
gott / das sie es solten anbeten / nach dem  
alles / was da war / zerstört war / Denn  
die Schrift heisset die Abgötter eigent-  
liche Greuel / darumb das Gott das  
für eckelt vnd grawet / Denn er keiner  
sünde so sehr feind ist / als dieser / Die an-  
dern strafft er wol / wirfft aber darumb  
die leute nicht hinweg / so sie busse thun /  
wie er im Psalm sagt vom Reich Chris-  
ti / So seine Kinder meine gesetze verlass-  
sen / so sie meine sitten entheiligen / vnd  
mein gebot nicht halten / So wil ich ire  
vbertrettung mit der ruten heimsu-  
chen / vnd mit plagen ire missthat /  
Aber meine güte wil ich nicht von im  
thun / vnd meinen glauben nicht lassen  
fallen.

Psalm 89.

Aber diese Sünde / so da heisset Ab-  
götterey / vnd ist eigentlich vnglaube  
vnd verlegung Gottes / die er gar  
nicht leiden kan / verdammet den Mens-  
chen gar / Denn wo das im herzen  
bleibt / das es recht leret vnd gleubet /  
weis / das vnser verdienst vnd würdig-  
keit nichts ist / vnd wir allein durch den  
Glauben Gott angenehme werden / vnd  
im recht dienen / So ist da ein recht  
Gottselig wesen / da bleibet liecht vnd  
warheit / Ob gleich da neben dem Glaus-  
ben mit lenfft / schwacheit des flei-  
sches / das ist noch nicht ein Greuel für  
Gott / sondern solche Sünde / die Gott  
wol straffet zur Busse / aber behelt doch  
das Volck / schonet vnd vergibt sie / wo  
sich die Leute zu im keren / vnd seine gü-  
te erkennen lernen. Dagegen wo der  
Glaub vnd rechte lere nicht ist / da ist  
alles verlorren / Denn es nicht möglich  
ist / das der Mensch im nicht einen fals-  
chen Gottesdienst auffrichte / vnd sein  
eigen dänckel vnd werck / von im erwe-  
let / anbere / Damit er eigentlich Gott  
vnd sein Wort verlegnet / dauon Gott  
gang

Abgötterey  
vnd vnglaube  
vnd machet  
alle Sünde  
vnergeb-  
lich.



## Auslegung des Euangelij

gantz abgewendet wird / das keine gnade da sein kan.

Solcher Grewel ist gemeiniglich der schönsten vnd grössersten Heiligen für der Welt leben / die auswendig in schönen wercken vnd geberden her gehen / inwendig aber vol vnflats sind / Wie wir bis auff den heutigen tag sehen / in vnsern Orden vnd Gottesdiensten / wo sie am besten sind. So doch widerumb eckliche Christen sind / die jenen in jren wercken vnd wesen nicht gleich scheinen / doch für Gott heilig sind.

**G**ott spricht nu Christus (wie gesagt) Wenn der Grewel / das ist / der Abgott in dem Tempel stehen wird / so wird das Reich endlich verwüestet vnd zerstöret werden / das hernach kein bauren mehr sein wird / Das drückt Lucas Klerlich aus mit diesen Worten. Wenn jr aber sehen werdet / Jerusalem belegert mit einem Heer / so mercket / das erbey Komten ist ire Verwüstung. Vnd folget so bald darauff / das er auch hie sagt / Als denn fliehe auff die Berge / wer im Jüdischen Lande ist etc. Item / Wer he aber den Schwangern vnd Sengerin zu der Zeit. Vnd / Bittet aber das ewer Flucht nicht geschehe im Winter oder am Sabbath / Denn es wird denn ein grosse Trübsal sein / als nie gewesen ist / noch werden wird.

Das gehöret noch alles zum Jüdischen Volk / Denn solt das vber vns gehen am ende der Welt / so müsten wir / lauts des Texts / im Jüdischen Lande sein / weil er eigentlich darauff deutet. So ist's auch war / das er sagt / Das keine grösser plage auff Erden Komten sey / noch Komten werde / als in der zerstörung gewesen ist / Als man in den Historien sehen kan / wie jemerlich sie vmbbrachte sind / vnd sich auch vnterinander selbs vmbbrachte haben / selbs ins Feuer gesprungen sind / vnd einer den andern hat lassen sich erwürgen / Ja / auch der hunger so gros ist gewesen / das sie die Sehnen von Armrost bogen frassen / dazu auch ire eigene Kinder. Ist so schendlich vnd greulich zu gegangen / das solcher Jamer vnd elend / nie mehr gehört ist.

Je woltens auch selbs haben / das sie Gott so verblendet vnd verderben lies / Er hette sich jr wol erbarmet vnd sie gerne erhalten / so brachten sie sich zu solchem Jamer mit jrem harten Kopff

das sie sich selbs müssen würgen vñ verzeren / das / wie sie es angriffen / alles solchen mord vnd Blutvergiessen stercken mußte. Also ist der tod Christi vnd aller Propheten an jnen greulich gnug geschehen / Darumb / das sie on auff hören wis der Gottes wort tobeten / vnd dazu die Aposteln verfolgten vnd verriagten / Wie Paulus sagt / das der Zorn Gottes / endlich vber sie Komten sey.

Wenn nu solcher schrecklicher Zorn vnd greuliche plage furhanden ist (sagt Christus) so fliehet wo hin jr nur fliehen können. Denn diese wort / So fliehe auff die Berge / wer im Jüdischen Lande ist / vnd wer auff dem Dach ist / Item / wer der Surst auff dem Felde ist etc. Sind alle auffsprichworts weise geredt / das so viel

gesagt sey / Mache euch eilend davon / je ehe je besser / vnd lasset euch nicht finden. Das geschach auch also. Da die Jüden gnug durch viel Zeichen gewarnt waren / das sie sich vnter die Römer geben solten / vnd sie nicht wolten / Da liessen die Jünger vnd Aposteln davon / vnd folgten diesem spruch Christi / liessen alles stehen vnd ligen / was im Jüdischen Lande war / Tereten auch nicht widerumb / er was wider zu holen.

Her aber (spricht er weiter) das ewer Flucht nicht geschehe im Winter oder am Sabbath / das ist / Sehet / das jr zu rechter Zeit fliehet / das jr nicht ergriffen werdet / Den er wolt kein wunder thun / das er sie mitten vnter den Feinden alleine erhielte / wiewol ers wol hette können thun. Denn er beschloss den harten / das er alles was da war / in einen hauffen wolte backen / Darumb hat es eitel verlornen hauffe müssen sein. Ist eine grosse Welt da zu Jerusalem gewesen / wie man schreibt / bey eilffmal hundert tausens Man / das in einander geschmolzen sind / so viel jr da waren. Darumb warnt Christus seine Jünger / das sie ire Flucht nicht spären auff ein Sabbath / daran man nicht wandeln thurste / noch im Winter / da es zu kalt ist / Sondern sich davon machen / je ehe je lieber / das wo sie verzüge / nicht ein ungelegne Zeit zu fliehen Komte.

So fern hat nu Christus von den Jüden geredt / Tu hab ich zuvor gesagt / das Mattheus vnd Marcus die zwey ende in einander mengen / darumb es hie schwer ist zu unterscheiden / vnd müssen

Luc 21.

Der Jüden Trübsal vnd Plage / die aller größte.

zu rechter Zeit fliehen.



müssens doch unterscheiden. Darumb mercke, das was bisher geredt ist, alles dorthin auff die Jüden gehet / Aber hie slichtet ers nu beides in einander / bricht aber kurz abe / fraget nicht viel nach der ordnung / wie die sprüche / so Christus gesagt hat / auff vnd nach einander gehen / sondern lest es dem Euangelisten Lucas befohlen sein / Wil aber so sagen / das es vor dem jüngsten Tage auch so gehen werde / vnd sprichet /

Vnd wo diese Tage nicht würden verkürzet / würde kein Mensch selig / Aber vmb der Auserwählten willen / werden die Tage verkürzet.

**W**as gehört auff beide teil / vnd ist die meinung / Der jamer solt nicht lange weren / vmb der Fromen willen / Denn auch der Krieg wider die Jüden nicht zwey ganze Jar gewehret hat / das wider friede worden ist. Weil aber das alles auch auff ende der Welt gehet / wollen wir die vorigen Sprüche von den Jüden / von vornher auff vns zihen / das wir dem Euangelisten gung thun.

Das ein solche Schlacht mehr kommen solle / wie vber die Jüden gangen ist / verseehe ich mich nicht / weil der Tert sprichet / Es werde solche trübsal sein / als nicht mehr werden wird / als man auch liest vnd sihet / Aber vns wird an der straffe widerfahren / wie jene leiblich gewesen ist / so wird am ende allermeist eine Geisliche gehen vber die Vnchristen / die gleich sind wie die Jüden. Also wird sich miteinander vergleichen / wie jene plage durch Gottes ordnung zu Jerusalem kam / vnd alles zu puluer machte / So greulich / ja noch greulicher wirds auch vorm jüngsten Tage gehen / wenn er komen wird / vnd der ganzen Welt ein ende machen.

Denn als Christus gen Himmel gefaren ist / hat er sein Reich nicht allein im Jüdischen land gespannet / sondern in die ganze Welt / durchs Euangelium ausgebreitet / Welches vberal gepredigt vñ gehört ist. Wir thun aber eben wie die Jüden / verleugnen vnd verfolgen Gottes Wort / vnd tödten die Christen / so das selb bekennen vnd predigen / Wie erstlich die Römer / vnd hernach bis auff diesen tag / Papst / Bischoue /

Kürsten / Mönche / Pfaffen / Welchs nu vber fünffhundert Jar her getrieben ist / das niemand Gottes Wort hat thuren predigen / on das sie auff der Cangel zum schein den Tert des Euangelij haben her verzelet / vnd darnach Menschen lere daraus gesogen / oder hinein gebracht / Wo sich jemand dawider hat geregt / sind sie mit schwert vnd ferwe dagegen gewesen / vnd das selb getu bet. Hilffe auch noch nicht / wie man sie warnet vnd schreckt / mit worten vnd zeichen / setzen den kopff auff / schreien vnd toben dawider / als die vnvernünftigen / Das je Gott vrsach gung habe / sie mit dem jüngsten Tag endlich vnd ewiglich zu verderben.

Darumb gehört der Spruch Danielis vns auch zu / von dem Grewel / Denn wir auch ein rechten wüsten Grewel haben / in einer heiligen Stete sitzen / Nemlich / in der Christenheit vnd der Menschen gewissen / da Gott allein regieren solt. Davon Daniel mit klaren / ausgedrückten worten viel schreibe / am 8. Item am 11. Capitel / Denn das ist die rechte reine Lere / so wir predigen / das wir durch Christum erlöset werden / von Sünden / Tod / Teuffel vnd allem vnglück / vñ in Gottes Reich gesetzt / durch das Wort vnd den Glauben / damit von allen gesezen frey gemacht / vnd das kein Mensch durch Gesezes werck / wie sie heissen mögen / zu Gottes Reich kome / noch der Sünden los werde. Wo solches gepredigt vñ geglaubt wird / da wonet Christus / vnd regiret im hertzen geistlich on mittel / das ist der heilige Geist / mit allen gütern vnd fülle des reichthums Gottes.

Wie thut aber der Papst ? Er sitzet nicht im leiblichen Tempel oder Gottes Tempel haus / Sondern in dem geistlichen / neuen vñ lebendigen / dauon S. Paulus sagt / So jemand den Tempel Gottes schendet / den wird Gott schenden / Denn der Tempel Gottes ist heilig / der seid jr. In welchen sich allzeit viel Teufel vnd Reizer vnterstanden haben zu setzen / vnd alle die / so predigen wider die rechte Lere / Wiltu selig werdē / so nim diesen oder jenen Stand oder Orden an / thu das oder dis werck. Zihen die Leute also heraus vom Glauben / auff die werck / führen doch daneben die wort / Christus sey der HEILIGSTE / im grund aber verleugne sie in.

Denn

Vrsach des  
letzten zorns

Letzter Gre  
wel des En  
dechrists.

Endliche  
straffe vnd  
zerstörung  
der Welt.

In Gottes  
Tempel sit.



## Auslegung Des Euangeli

Wenn sie kein wort davon sagen / das er allein aus gnade die Sünde ver-  
gebe / von Tod vnd Helle erlöse / Son-  
dern also / durch diesen Orden / durch sol-  
che werck / mus man sünde büßen / dafür  
gnug thun vnd gnade erlangen. Welche  
eben so viel ist / als sagestu / Christus hat  
es nicht gethan / ist nicht der heiland /  
sein Leiden vnd Tod können nichts hel-  
ffen. Denn sol es dein werck thun / so kan  
ers durch sein Blut vnd Tod nicht  
thun / Es mus je der zwey eins verges-  
bens sein / Bleibstu auff deinen wercken /  
so treibestu Christum aus / verleugnest  
vnd schendest sein theures Blut vnd in-  
gar mit einander / So kan er nicht durch  
sein Wort / Werck vnd Geist im her-  
zen sitzen vnd regieren / sondern mein  
werck ist mein Götz / den lasse ich sitzen  
vnd regieren.

Gewel des  
Papstums.

So sehe nu / ob nicht der Papst der  
höchste Erzgeruel aller Gewel ist /  
den Christus vnd Daniel meinet / vnd  
der rechte Endechrist / davon geschrie-  
ben ist / das er sitze im Tempel Gottes /  
in dem Volck / da Christus genennet ist /  
da sein Reich / Geist / Tauffe / Wort vnd  
Glaube sein sol / Weil er durch sein ge-  
schwärm des geistlichen Reiches / Chris-  
tus in sein Ampt vnd Reich greiffet / wil  
vber die Gewissen herrschen / vnd mit  
seinen Auffzügen vnd wercken regieren /  
Vnd heisset wol ein wüster Gewel / das  
ist / der nur alles zerstöret vnd verwüstet.  
Denn wie gesagt ist / Es kan nicht bey  
einander bleiben / Christus vnd mein  
werck / siehet eins / so mus das ander vn-  
tergehen vnd zerstöret werden / Darumb  
hat der Papst Christi Reich gar ver-  
wüstet / so weit sein Sprengel-reichet /  
vnd die es mit im halten / haben alle  
Christum verleugnet.

Das hat alles S. Paulus von im  
geweissaget / 2. Thessa. 2. Als er in heis-  
set den Menschen der Sünde / vnd das  
Kind der verderbung / der da ist ein Wi-  
derwertiger / vnd sich vberhebt vber al-  
les das Gott oder Gottesdienst heisset /  
Also / das er sich setzet in den Tempel  
Gottes / als ein Gott / vnd gibe sich für /  
er sey Gott. Das aber die Papisten diesen  
Spruch von sich wenden wollen / vnd  
sagen / Christus vnd Paulus reden vom  
Tempel zu Jerusalem / das der Endes-  
christ daselbs sitzen vnd regieren werde /  
glt nichts / Dem Christus hie sagt / das

Sitzen des  
Endechristi  
im Tempel  
Gottes.

Jerusalem sampt dem Tempel ein ende  
haben / vñ nach der zerstörung nimer ges-  
barwet werden sol. Darumb wil Paulus  
auff die zeit nach des Jüdischen Reichs  
vnd leiblichen Tempels zerstörung deu-  
tet / kan es nicht / denn vom newen geist-  
lichen Tempel verstanden werden. Wel-  
cher (wie er selbs sagt) sind wir.

Da sol der Papst sitzen vnd geeh-  
ret werden / nicht vber Gott / sondern  
vber alles das da Gott heisset (sprichet  
er) Denn Gottes Namen bleibet natür-  
lich die höchste ehre / Darumb kan er sich  
vber den rechten natürlichen Gott nicht  
setzen / Sondern vber das / das Gott vnd  
Gottesdienst heisset / das ist / vber seine  
Predige vnd ehre wird er erhaben / hö-  
her / denn der rechtschaffene Gott. Wie  
für augen ist / das so viel Fürsten vnd die  
Welt an im hangen / vnd sein Gesetz hö-  
her vnd mehr / denn Gottes Gebot /  
halten.

Vber Gott  
erhaben sein

Wenn jemand wider sein gebot  
Fleisch isset / oder aus dem vneinen  
Paffen / Mönch vnd Nonnen Stand /  
sich in ein Helich leben gibt / wie Gott  
geboren hat / oder nach Christi ord-  
nung / das Sacrament in beider gestalt  
nimer / das ist die größte sünde / Das bey  
inen viel geringer sind / stelen / ehebre-  
chen / vnd alle öffentliche laster wider  
Gottes Gebot / vnd sie auch niemand  
darumb straffen thar / Ja / das sie selbs  
Gottes Wort lestern / die Christen ver-  
folgen vnd umbbringen / achten sie für  
den höchsten Gottesdienst / wie es auch  
der höchste dienst ist / so sie jem Gott  
dem Papst thun künden. Heisset das  
nicht den Endechrist recht vber Gott  
gesetzt vnd geehret / Also / das / wer das  
wider redet oder thut / wenn er in je-  
hende komet / so bald sterben mus / Ich  
meine je / es sey gnug den Gewel abge-  
malet vnd ausgestrichen.

Je ist nu hohe zeit / das da lauffe  
vnd flühe / wer da flühen kan / lasse ste-  
hen vnd ligen was er hat / vnd mache  
sich davon / je ehe je besser / Nicht mit  
füßen / sondern mit dem hertzen / also /  
das man des Gewels los werde / vnd  
durch den Glauben in Christi Reich tre-  
te. Es gehört aber ein verstand vnd  
scharff gesicht dazu / das man den  
Gewel recht erkenne / Ist aber nicht  
bas zu sehen / denn wenn man in gegen  
Christum helt / Der leret / wie oben ge-  
sagt /



sage / das wir durch sein Blut mit Gott versünet vnd selig werden. Der Papst aber gebe solche Krafft vnsern wercken. So siehestu je / das widernander ist / durch werck wollen selig werden / vnd an Christum / als vnser gerechtigkeit für Gott / glauben. Wiltu nu bey Christo bleiben / so mustu den Papst fliehen vnd faren lassen.

Zerstörung  
des letzten  
Gewels.

2. Thessal. 2

Das ist nu der wüste Grewel / der zu vnser zeit regieret hat / aber nu aus Gottes gnade offenbart ist / Wird aber nicht durch Keiser oder weltliche gewalt zerstört werden / Es mus alles höher denn jene leibliche zerstörung sein / da doch so gros trübsal gewesen ist / das kein grössere sein mag leiblich. Darumb hat im Gott allein diesen Grewel furbehalten zu vertilgen / Wie Paulus sagt / Welchen der HERR erwürgen wird mit dem geist seines Mundes / vnd wird sein ende machen / durch die erscheinung seiner zukunfft.

Wiewol sie sich vbel fürchten fur weltlicher gewalt vnd auffrühr / Es solt ihnen aber nicht so gut werden / Denn sie solcher linder straffe nicht werd sind / vnd in Gott nicht gönnet / das sie durch Menschen zerstört werden / sondern wil es selbs on mittel thun durch sein Wort / Wie es denn nu angangē / vnd sein Reich je so fern zerstört ist / das es nicht mehr gilt / noch die gewissen fange / deren / so das Euangelium wissen / Ja / wie feindlich der Papst wider das Euangelium strebt / mus er dennoch jzt den weltlichen Fürsten zu füssen fallen / vnd bey ihnen hülfte suchen. So ist ja seine Macht durchs Euangelium geschwecht vnd gebrochen / Aber seine endliche zerstörung wird auff den Jüngstentag behalten. Darumb mus es noch zum teil bleiben / so lang bis Christus mit seiner zukunfft alles in einen hauffen vertilge / vnd zu puluer mache von Himel herab.

Aber wie jenes mal bey den Jüden die tage verkürzt sind worden / als Christus sagt / so müssen sie jzt auch verkürzt werden vmb der Auserweleten willen / Wie wir sehen / das des Papsts Regiment bey hundert jaren her / jüner widerstand gehabt hat vnd abgenamen / On das in dem Concilio zu Costniz / da Johannes Zusa verbrand ward / er jederman schreckte / das man in für Gott hiele / Die warheit aber kam doch bald erfür / bis

jzt her / da es nu gar veracht ist / vnd nicht lang mehr stehen kan. So gehet nu dis / wie gesagt / nicht allein auff die Jüden / sondern auch auff vnsern grewel des Papstums. Spricht nu Christus weiter.

So denn jemand zu euch sagen wird / Siehe / hier ist Christus / oder da / solt irs nicht glauben.

Diese folgende Sprüche solt man wol wissen vnd fassen / den Papst vnd seine Kotte damit für den Kopff zu stossen / Welche das Reich Christi heraus führen / vnd ein Christlich leben binden / an eusserlich / sichtlich ding / wie sie denn öffentlich sagen / Wo der Papst ist / da ist die Christliche Kirche / Damit sie vns dahin führen wollen / das wir sie finden / fñlen vnd greiffen sollen / an person / stete vnd weise / das alles eusserlich ist.

Also thun alle Klöster vnd Stifter / Wenn du (sagen sie) diesen Stand annimmest / so issest / dich kleidest / so betest / so fastest / so wirstu deine sünde büssen vnd selig werden. Solchs hat vns Christus hie fein zumor abgemalē / vnd eben auff alle Klöster / Stende vnd Werck gezilt / damit sie den Seelen wollē helfen / Vnd warnet vns / das wir vns dafür hüten / vnd von dem grunde / darauff wir stehen / nicht lassen reissen / das wir durch der keines Christen werden / sondern allein durch sein Blut von allem vbel erlöset / vnd in sein Reich gesetzt werden / so wir glauben / Reisset vns damit alles zeitlich / eusserlich ding aus den augen / stößet mit einem wort darnider alle Lere / so nicht den Glauben reine predigen / vnd alles leben / so nicht nach der rechtschaffene Lere des Glaubens gerichtet ist. So ist küniglich (das er spricht / wenn jemand sagt / Hie oder da ist Christus / so glaubt nicht) so viel geredt / Hütet euch für allem / was euch auff Werck füret / denn es treuget gewislich / vnd reisset euch von mir.

Christi reich  
nicht in eusserlichen  
sagungen.

Denn es werden falsche Christen vnd Propheten auffstehen / vnd grosse Zeichen vnd Wunder thun / das verführet werden in den irthum (wo es möglich were) auch die Auserweleten.

Ca

DJe



Auch die au-  
sterweltet vn-  
ter dem  
Papstum in  
Ierthum ge-  
färet.

**D**Is sind treffliche / ernstliche vnd  
schreckliche wort. Das diese werck  
prediger mit solchem schein vnd  
nachdruck / solchs in die Leute treiben  
sollen / das sich auch die Heiligen / so im  
Glauben stehen / nicht dafür können hü-  
ten / sondern auch mit irren müssen / wie  
auch geschehen ist / Denn die lieben Vete-  
ter / Augustinus / Hieronymus / hoffe ich  
auch / Item / S. Bernhardus / Gregorius  
us / Franciscus / Dominicus / vnd viel  
mehr / wiewol sie heilig gewesen sind / ha-  
ben sie dennoch hie alle geirret / wie ich  
offtmal anderswo beweiset habe / Denn  
der Ierthum ist zeitlich angangen / vnd  
sind mit andern auch darein geraten /  
das sie Christlich wesen bunden an eusser-  
lich ding / vnd so weit hinein geführt / das  
sie mit eusserlichem wandel selbs hinein  
getreten sind.

Als man sibet in S. Bernhardus  
Bücher / wie vbel er schreibet / wenn er  
jemand antworten sol auff solche Fra-  
gen / von irer Möncherey / Wo er aber  
frey dahin aus seinem Geist schreibet /  
so sein predigt / das lust ist / Wie auch  
Augustino / Cipriano dem grossen heil-  
igen Märterer / vnd vielen mehr widerfa-  
ren ist / Wenn man jnen irgend eine fra-  
ge furgelegt hat / von gesetzen oder eusser-  
lichen ordnungen / ob mans so oder so  
halten sol / sind sie hinnach geplumpet /  
vnd hinein getreten / das nicht weit ge-  
feilet hat / das sie verführet worden we-  
ren. Noch führen die Papisten das am al-  
ler stercksten wider vns. Solten so viel  
heilige Leute vnd Lerer geirret haben /  
(sagen sie) vnd Gott die Welt so verla-  
ssen haben? Sehen nicht / das sie dieser  
Spruch fur den Popff stößet / das sie  
daumeln möchten.

Was sol man jnen nu antworten?  
Der Spruch ligt durre vnd klar da / den  
müssen wir glauben vnd stehen lassen /  
können nicht dafür vber / wenn gleich  
die heiligen Engel im Himel dagegen  
waren / Oder sol Christus nicht heilig  
sein / vnd sein Wort nicht so viel gelten  
als jr wort? Denn er sagt je nicht von  
vielen / oder vom grossen hauffen / Er  
Omnes / sondern von dem kleinsten  
heufflin der Auserwelden / das die strau-  
cheln sollen / so ferne / das sie schier möch-  
ten verführet werden. Vnd warnet vns /  
das wir auch an jnen nicht hangen sol-  
len / wenn wir sehen / das sie eraus auff

eusserlich ding fallen / haben sie nu nicht  
geirret / so mus Christus nicht warhaff-  
tig sein / als ers verkündigt hat.

Wenn nu gleich alle Heiligen her-  
treten / vnd hiessen mich an Papst gleu-  
ben / wil ichs dennoch nicht thun / son-  
dern so sagen / Ob jr schon abserwelet  
seid / so hat dennoch Christus gesagt / es  
sollen so grewliche / fehrliche zeit sein /  
das auch jr irren müßet / Darumb müs-  
sen wir allein an der Schrifft vnd Got-  
tes wort hangen / der sagt also / Er sey  
nicht hie noch da / Wo er ist / da sol ich  
sein / Er wil nicht sein / da mein werck  
oder stand ist / Wer mich nu anders ler-  
ret / der treugt mich. Darumb sage ich  
noch / das nicht gilt / das sie auffwers-  
ffen / Die heiligen Vetter vnd Lerer ha-  
bens so gehalten / so gelebet / darumb  
müssen wirs auch so halten vnd leben /  
Sondern das gilt / Christus hat so gele-  
ret vnd gehalten / darumb müssen wirs  
auch halten / Denn er ist mehr denn alle  
Heiligen.

Etz / ich habts euch zuuor ge-  
sagt / Darumb / wenn sie zu euch sa-  
gen werden / Etz / er ist in der Wü-  
sten / so gehet nicht hinaus / Etz /  
er ist in der Kämmer / so gleubet nicht.

**Z**ur zeit der heiligen Vetter / Ant-  
oni vnd andern / zeitlich nach den  
Aposteln / ist schon der Ierthum auff-  
gangen / davon hie Christus sagt (wie  
wol Antonius viel gewehret) das alles  
in die Wüsten lieff / bey viel tausent  
vnd gewan ein solchen schein / das es her-  
nach Hieronymus vnd Augustinus schier  
anbeteten / vnd nicht wussten hoch gnug  
zu preisen / Vnd wenn mans beim lieche  
ansihet / so ist dieser Text gewaltig da-  
wider / sind auch vnter denselben viel  
Beter gewesen / vnd viel verdampft /  
Vnd / ob gleich heilige Leute darunter  
waren / die der verführung entrannen  
sind / ist doch das Exempel fehrlich vnd  
nicht fur zufragen. Als auch S. Fran-  
ciscus mag ein heiliger Man gewesen  
sein / aber dem Exempel vnd Orden / so  
er auffgericht hat / nicht zu folgen ist /  
Solches aber hat niemand erkand / auch  
von den Heiligen / so tieff vnd mit gro-  
ßem schein ist es eingerissen.  
Als Christlich leben ist nicht ge-  
spannet auff die Wüsten / sondern sol  
frey



frey daher gehen/ wie Christus vnd die Apostel gelebt haben/ das man erfür trete vnter die welt/ öffentlich predige vnd vermane/ das man die Leute zu Christo bringe/ So lauffen jene von Leuten in die Wüsten/ wöllen nicht in der Welt bleiben/ da sie viel leiden mussten/ erwehlen inen ein eigen streng leben/ wollen da mit höhere Christen sein denn andere. Wie auch die Klöster thun/ die Christus meinet mit den Bamern. Beschleusst nu Christus/ vnd spricht.

Denn gleich wie der Blitz ausgehet vom Ausgang/ vnd scheint bis zum Niedergang/ also wird auch sein die zukunfft des Menschen Söng.

**W**il so sagen/ Glaubt nur nicht/ wenn man euch Christum so hie oder dort hin bindet/ vnd vom Glauben auff werck füret/ Ich warne euch/ das jr vom reinen Glauben nicht fallt/ Denn jr wisset nicht/ welche stunde ich kómen werde/ Wenn sichs niemand versihet/ werde ich herein schlagen/ so behend als ein Blitz am Himmel leuchtet/ Wer denn am Glauben nicht hafftet/ der wird verloren. Darumb sehet zu/ das euch der tag nicht oberfalle/

bleibt wacker im Glauben/ das/ wo jr faul seid/ vnd schlaffet/ euch der Teuffel nicht davon reisse. Aber diese wort sind hie vnordig nach einander gesetzt. Denn (wie gesage) Matheus die sprüche nur verzelet auff einen hauffen/ aber nicht ordent. Darumb reimet sich nicht so eigentlich auff diese wort/ das da folget.

**W**d aber ein ass ist/ da sammeln sich die Adeler.

Das ist/ Ir dürfft nicht darnach fragen/ wo die stete sein wird/ da Christus kómen wird. Ich sey wo ich wolle/ so werden wir vns wol zusámen finden/ wie man spricht/ Wo ein ass ist/ da sammeln sich die Adeler. Denn wie die Adeler inen kein ort abmalen/ wo sie fliehen wollen/ sondern wo ein ass ist/ da finden sie sich hin. Also werden sich die meinē wol zu mir finden/ Wo ich bin/ da werden meine Auserweleten auch sein. Das ist der Text vom ende der Jüden vnd der Welt/ Darauff menget nu Matheus die sprüche von den Zeichen des Jüngsten tages/ welchs alles Lucas Flerlicher schreibt/ Das gehöret auff ein ander zeit/ vnd ist anderswo gnüg gehandelt.

## Am XXVI. Sonntag nach

Trinitatis/ Epistel / 2. Thessal. 1.



**W**ir sollen Gott danken allezeit omb euch/ lieben Brüder/ wie es billich ist.

Denn ewer glauwe wechset seer/ vnd die Liebe eines iglichen vnter euch allen nimet zu gegenander/ Also/ das wir vns ewer rhümen vnter den Gemeinen Gottes/ von ewer Gedult vnd Glauben/ in als

len ewern verfolgungen vnd trübsalen/ die jr duldet.

Welches anzeigt/ das Gott rechte richten wird/ vnd jr würdig werdet zum Reich Gottes/ vber welchem jr auch leidet/ Nach dem es recht ist bey Gott/ zu vergelten trübsal/ denen/ die euch trübsal anlegen/ Euch aber/ die jr trübsal leidet/ ruge mit vns/ Wenn nu der HERR Ihesus wird offenbart werden vom Himmel sampt den Engeln seiner krasse/ vnd mit Fetr flammen/ Rache zu geben vber die/ so Gott nicht erken-

Q ü ü nen/



## Auslegung der Epistel

nen / vnd ober die / so nicht gehorsam sind / dem Euangelio vnsers HERRN Ihesu Christi.

Welche werden pein leiden / das ewige verderben / von dem angesichte des HERRN / vnd von seiner herrlichen Macht / wenn er komen wird / das er herrlich erscheine mit seinen Heiligen / vnd wunderbar mit allen Gleybigen. Denn vnser zeugnis an euch von demselbigen tage / habt jr geglaubet.

Summa dieser Epistel.



**E**rliech preiset S. Paulus hie seine Kirche zu Thessalonica / welche der feinsten vnd besten eine gewesen / ihres glaubens vnd Liebe halben / so vnter dem Creutz vnd verfolgungen bestanden vnd zugenomen / durch gedult / Sie damit zu reizen in dem selben also fort zu faren / damit er auch andern ein Exempel vnd Bilde furstellet der fruchte / so die Predigt vnd Erkentnis des Euangelij wirken sol / vnd zeigt / worin die rechten Kirchen Christi erbawung vnd auffnemen stehe. Darnach tröstet er sie (vber jrem leiden vnd gedult) der herrlichen zukunfft des HERRN Christi / zu jrer erlösung vnd vergeltung jrer trübsal / mit ruge vnd freuden / vnd der ewigen rache vber jre Verfolger etc.

Der leiden den Christen trost von Gottes rechten Gericht

ER füret aber solchen trost eben von jrem leiden / vnd Gottes rechtem gericht. Damit er zeigt / warumb er sie auff Erden leiden leste / vnd was er beschlossen habe / dabey zu thun. Denn wenn man die Christenheit mit menschlicher vernunft vnd gedanken ansihet / so scheinete auff Erden kein elender / geplagter vnd vnseeliger Volck / denn diese / so den gecreuzigten Christum bekennen vnd rühmen.

Christen die elendesten Leut in diesem leben.

Denn sie on vnterlas in der Welt verfolgt / dazu vom Teufel geplagt vnd angefochten werden / mit allerley jamer / not / vnfall / tod etc. Das es auch in jren augen nicht anders scheinete / denn als seien sie bey Gott / fur allen Menschen / vergessen vnd verlassen / weil er fur vnd fur sie leste vnter dem Creutz gedrückt liegen / da die ander Welt / sonderlich jre

Verfolger in grossen ehren / glück / freuden / gewalt / reichthum leben vnd schweben / vnd gebet jnen wie sie wollen. Wie offte die Schrift / vnd sonderlich die Psalmen davon klagen / Vnd S. Paulus 1. Corin. 15. selbs bekennet / vnd spricht / Hoffen wir allein in diesem leben auff Christum / so sind wir die elendesten vnter allen Menschen.

W mus es ja nicht also sein vnd bleiben / vnd kan nicht Gottes meinung sein / das er seine Christen ewig vnd on auffhören also solt lassen leiden / vnd darüber also dahin sterben vnd in tod bleiben / Denn das were seiner ewigen göttlichen Ehre vnd Wahrheit ungemess / so er durch sein Wort bezeuget / das er wolle der fromen Gott sein / die in fürchten vnd vertrauen / vnd jnen so grosse verheissung gegeben hat.

Daraus folget / das er mus ein anders bey jm beschloffen haben zugesagt / beide seinen Christen / vnd auch dem andern hauffen / denn sie beide jzt auff Erden haben. Vnd das eben das sey eine der furnemesten vrsachen / warumb er die Christen auff Erden leiden leste / das er damit zeige / das er gedulde ein ander wesen mit beiden zu machen. Darumb mus jzt / beide / der gleybigen Christen leiden / vnd der gottlosen Welt bosheit / tyranny / toben vnd verfolgen der fromen / ein gewis zeugnis sein eines andern zukünftigen lebens / vnd endlichen Gerichtes Gottes / das durch allen Menschen / fromen vnd bösen / sol ewiglich / vnd on auffhören vergolten werden.

Der Christen leiden / ein zeugnis des zukünftigen Gerichtes.

S Jhe / das wil hie S. Paulus / so er spricht von dem trübsal vnd leiden der Christen / welches anzeigt / das Gott recht richten wird / vnd das jr würdig seiet zum Reich Gottes / ober welchem jr auch leidet etc. Als solt er sagen / O lieben Christen / lasse euch ewer leiden lieb vnd werd sein / dencket nicht / das Gott darumb mit euch zürne / oder ewer vergessen habe / Denn jr habt daran einen grossen / reichen nutz vnd trost / nemlich / das jr dadurch das zeugnis habe / das Gott wil ein rechter Richter sein / vnd euch reichlich seligen / vnd dazu an ewern Verfolgern rechnen.

JA ein gewis zeugnis habt jr daran / vnd möget euch daher ungezwungen

*Si iustus deus esse bene, mirum non est  
male his qui iniqui, affligantur. Minus  
a Saturno, a laeua, necesse est alia  
reparare vitam, ubi per in peccatis  
impis iudicium exacerbat, id est, per  
bona eius, impis non male, ubi praemia  
impis reddantur, in iustis non praemia infliguntur.*



welt trösten vnd frewen/ das jr zu Gottes Reich gehört / vnd schon desselben würdig gemacht seid/ weil jr vmb desselben willen leidet / Denn was ein Christen hie auff Erden leidet / vom Teuffel vnd der Welt/ das widerferet jm gewislich allein vmb Gottes Namens vnd Worts willen.

Denn es solt wol billich also sein/ weil er getaufft vnd nu Gottes Kind ist/ das er auch eitel guts/ trosts vnd freude auff Erden hette. Nu er aber allhie noch in des Teuffels reich ist / welcher auch die Sünde vnd Tod in sein fleisch gesteckt/ So mus er auch jm her halten/ Aber doch / was er an jm thut mit seinem vnd der Welt plagen / verfolgen/ schrecken/ marter vnd tod / daran thut er jm gewalt vnd vnrecht. Darumb hat er auch hie wider durch Gottes wort den trost/ weil er vmb Christi vnd Gottes Reich willen leidet/ das er auch gewislich ewiglich desselben teilhaftig sein sol/ Denn es wird freilich niemand desselben würdig/ denn wer da auch vmb dasselbige leidet.

Nach dem es recht ist bey Gott/ (spricht er weiter) zu vergelten trübsal/ denen/ die euch trübsal anlegen etc. Es mus vnd kan nicht ewig also sein noch bleiben/ wie jgund/ das es der welt wol gehe / euch aber vbel gehe / Denn Gottes gerechtigkeit leidets nicht/ Sondern weil er ist ein gerechter Richter / so mus es ein ander ding werden / das die fromen ewiglich gut haben / die bösen auch dagegen ewig gestrafft werden/ Sonst würde Gott nicht recht richten/ welches eben so viel were / als das er nicht solt Gott sein.

WEl aber das vnmüglich ist/ vnd Gottes Gerechtigkeit vnd Wahrheit nicht kan geendert werden/ So mus er/ als der Richter / drein sehen / vnd einmal von Himmel komen (wenn er nu seine Christen alle zusammen gebracht hat) vnd sie rechen an iren feinden/ vnd sie bezalen/ was sie verdienet haben/ vnd diesen/ auch fur jr zeitlich leiden/ das sie hie gehabt/ ewige ruge vnd freude geben.

Dies mögen vnd sollen sich die Christen gewislich versehen vnd trösten / das Gott nicht wird also lassen hingehen/ vngestrafte vnd vngerochen/

als habe ers vergessen (wie es jzt scheinet) das der frome Habel so schendlich von seinem Bruder ermordet ist / vnd seine Propheten vnd Marterer/ als Johannes der Teuffer / Jeremias / Paulus vnd andere von iren Bluthunden/ Herode/ Nerone / vnd dergleichen schendlichen Tyrannen vnd wütrichen sollen hin gerichtet sein / weil er jnen auch in diesem Leben herrlich zeugnis gegeben hat/ das sie seine lieben Kinder gewesen. Darumb mus endlich das Gericht nicht nach bleiben/ das die Tyrannen ire pein vnd straffe leiden / vnd die fromen auch jres leidens ergetzt / ewige ruge vnd freude haben/ Damit alle welt sehe/ das Gott jr auch nach irem tode nicht vergessen habe etc.

SJhe/ das ist der trost des zukünftigen Gerichts/ in der auferstehung der Todten/ welches Gottes gerechtigkeit fordert/ das den Heiligen jr leiden auff reichlichst/ herrlichst vergolten werde. Vnd zeucht also S. Paulus dieses als die furnemest vrsache an (inen zu mehrerem trost) das Gott müsse die Welt mit ewiger pein straffen/ das sie seinen Christen trübsal anleget.

WElches ist also geredt / als lige Gott nicht so hoch an dem / das beide/ der Teuffel vnd die Welt wider jm thun/ durch hohe verachtung/ vnd dazu lesterung vnd hasse seines Namens vnd Worts / on allerley ander bosheit vnd vngehorsam/ damit sie ire ewige pein vnd verdammis vber sich führen / Sondern das er viel mehr gedencke / an jnen zu straffen/ das sie seine arme glaubige Christen verfolgen vnd plagen / Wie auch Christus solchs am jüngsten Tage anzihen wird/ vnd sagen / Gehet hin jr Verfluchten ins ewige sewer / welches bereitet ist dem Teuffel vnd seinen Engeln/ Denn was jr nicht gethan habt einem vnter diesen geringsten/ das habt jr Mir nicht gethan etc.

WAs S. Paulus weiter erzelet/ wie das Gericht werde zugehen / vnd was da werde sein die pein vnd straffe der Gottlosen/ ist an jm selbs klar gnug/ vnd durchs folgende Euangelium verklarert/ Das nicht not ist hie mehr danon zu sagen.

Vrsach vnd trost des zukünftigen Gerichts.

Die schwerste verdammis verdienet die Welt an den Christen.

Gott mus seinen eigen Namen in den leiden den Christen an der Welt vnd Teuffel rechen.

Gottes Gerechtigkeit leidet nicht das die Vnchristen nicht sollten geestrafte/ vnd die Christen belohnet werden.



# Am XXVI. Sonntag nach

Trinitatis / Euangelium /  
Matth. 25.



**L**HEES  
sprach zu sei  
ne Jüngern/  
Wenn aber  
des Men  
schen Son  
komen wird  
in seiner  
Herlichkeit/  
vnd alle heilige Engel mit im / Denn  
wird er sitzen auff den Stuel seiner  
Herlichkeit / vnd werden für im als  
le Völcker versamlet werden / Vnd  
er wird sie von einander scheiden/  
(Gleich) als ein Hirte die Schafe  
von den Böcken scheidet) vnd wird  
die Schafe zu seiner Rechten stellen/  
vnd die Böcke zur Linken.

Da wird denn der König sagen

zu denen zu seiner Rechten / Komet  
her jr Gesegneten meines Vaters /  
Ererbet das Reich / das euch berei  
tet ist von anbegin der Welt. Denn  
ich bin hungerig gewesen / vñ jr habe  
mich gespeiset. Ich bin durstig gewe  
sen / vnd jr habe mich getrencket. Ich  
bin ein Gast gewesen / vnd jr habe  
mich beherberget. Ich bin Nacket ge  
wesen / vnd jr habe mich bekleidet.  
Ich bin krank gewesen / vnd jr habe  
mich besucht. Ich bin gefangen ge  
wesen / vnd jr seid zu mir komen.

Denn werden im die Gerechten  
antworten / vnd sagen / HERR /  
Wenn haben wir dich hungerig ge  
sehen / vnd habe dich gespeiset? Oder  
Durstig / vnd haben dich getrencket?  
Wenn haben wir dich einen Gast  
gesehen



gesehen/ vnd beherberget? Oder nackt/ vnd haben dich bekleidet? Wenn haben wir dich krank oder gefangen gesehen/ vnd sind zu dir komen? Vnd der König wird antworten / vnd sagen zu jnen/ Warlich/ ich sage euch/ Was jr gethan habe einem vnter diesen meinen geringsten Brüdern/ das habe jr Mir gethan.

Denn wird er auch sagen zu denen zur Linken / Gehet hin von mir / jr verfluchten / in das ewige Feuer / das bereitet ist dem Teufel vnd seinen Engeln. Ich bin Hungerig gewesen / vnd jr habt mich nicht gespeiset. Ich bin Durstig gewesen / vnd jr habt mich nicht getrencket. Ich bin ein Gast gewesen / vnd jr habt mich nicht beherberget. Ich bin nackt gewesen / vnd jr habt mich nicht bekleidet. Ich bin krank vnd Gefangen gewesen / vnd jr habt mich nicht besucht.

Da werden sie im auch antworten / vnd sagen/ HERR/ wenn haben wir dich gesehen hungerig/ oder durstig / oder einen Gast/ oder Nackt / oder krank / oder Gefangen / vnd haben dir nicht gedienet? Denn wird er jnen antworten/ vnd sagen/ Warlich/ ich sage euch/ Was jr nicht gethan habe einem vnter diesen geringsten / das habe jr mir auch nicht gethan. Vnd sie werden in die ewige Pein gehen / Aber die Gerechten in das ewige Leben.

Summa die  
ses Euange-  
lij.



Das Euangelium ist an jm selbs / den Worten nach / klar vnd liecht. Es ist aber gesagt / beide/ zu trost vnd vermanung den Gleubigen vnd Christen/ Vnd den andern zur warnung vnd schrecken / wo es bey jnen helfen wole. Vnd wie die meisten Euangelia fast allein den Glauben leren vnd treiben/ Also lau-

tet dis Euangelium von eitel wercken/ die Christus am Jüngsten tage anzihen wird/ Damit man sehe/ das er der selben wil auch nicht vergessen/ sondern getrieben vnd gethan haben/ von denen/ die da wollen Christen sein / vnd in seinem Reich erfunden werden.

Und treibet solche vermanung selbs alhie auff's aller sterckest/ wie sie jmer kan getrieben werden/ beide/ mit der tröstlichen verheissung der herrlichen ewigen belohnung/ vnd schrecklichstem drewen des ewigen zorns vnd pein / deren / die solche vermanung verachtet haben. Das/ wen dieses nicht bewegt vñ reizet/ den wird gewislich nichts bewegen.

Denn er spricht/ das Er selbs in seiner Maiestet am Jüngsten tage offenbarlich komen wolle/ mit allen Engeln/ vnd die/ so an in gegleubt/ vñ die liebe an seinen Christen erzeiget haben/ selbs in das Reich der ewigen herrligkeit seines Vaters/ setzen wil/ Vnd widerumb/ die/ so nicht haben wollen als Christen leben/ auch von jm vnd allen seligen abgesondert/ ewiglich zur Hellen verstorffen.

Christi zu-  
kunft am  
Jüngsten  
tage.

Wo / wo vns dieses nicht gesagt were / würden wir aus der massen begirig sein zu hören / wie es doch am Jüngsten tage zugehen würde / vnd was der HERR Christus daselbs sagen oder thun würde. Nu hören wir es hie/ vnd haben fur augen / zu erst den Tod/ dem niemand wird entlauffen / darnach den tag des Gerichts / Welches sol also zugehen/ das Christus wird zusammen bringen (durch die Auferstehung) alle Menschen / so je auff Erden gelebt/ Vnd zugleich herab komen mit grosser vnaussprechlicher Maiestet/ auff seinem Richtstuhl sitzend / vnd mit jm alles himlisch Heer umb den Richter her schwebend / vnd wird also erscheinen allen bösen vnd guten / das wir auch alle werden fur jm offenbarlich stehen/ vnd niemand wird sich verbergen können.

Dieser anblick solcher herrligkeit vnd Maiestet/ wird so bald den verdampften das größte schrecken vñ pein sein/ wie die Epistel hienon gesagt hat / das sie werden pein leidē des ewigen verderben von dem angesicht des HERRN etc. Denn wo auch nicht mehr den ein einiger Engel da were / so würde doch der flüchtigen bösen gewissen (wo es möglich were zu entfliehen) keines fur jm bleiben. Kan

Schrecken  
vnd pein der  
verdampften  
vom ange-  
sicht des  
HERRN.



## Auslegung des Euangelij

doch ein Dieb vnd Schalk nicht wol leiden / das er für einem menschliche Richter sol stehen / Künd er entgehen / so thut er es viel lieber / auch allein darumb / das er öffentlich nicht zu schanden würde / schweig denn / so er sol hören das vrtail des Todes vber in gehen.

Was wird denn das für ein schrecklich ansehen sein / da die Gottlosen nicht allein alle Engel vnd Creaturn / sondern den Richter in seiner Göttlichen Majestet werden sehen / vnd hören das vrtail des ewigen verderbens vnd hellischen ferns ewiglich vber sie sprechen. Das solt ja billich allein eine starcke / kreffrige warnung sein / das wir vns also dar ein schickten / als Christen / das wir mit ehren vnd vnerschrocken für diesem **GERICHTE** der Majestet sehen möchten / zu seiner Rechten / da keine surcht noch schrecken / sondern eitel ewiger trost vnd freude sein wird.

Sonderung  
der Böcke  
von den  
Schafen.

**D**enn er wil als denn (spricht er hie selbs) so bald die Böcke scheiden von den Schafen / das es für allen Engeln / Menschen vnd Creaturn öffentlich gesehen werde / welche seine fromen rechtschaffene Christen gewesen / vnd dagegen auch die falschen Zeuchler / sampt dem ganzen hauffen der Gottlosen Welt / welche scheidung vnd sonderung bis auff den selben tag nicht kan in der Welt geschehen (auch in dem hauffen / da doch die Kirche Christi ist) sondern müssen hie gute vnd böse vnternander bleiben / Wie die Gleichnis von den Hochzeitgesten Matth. 20. sagt / Wie auch Christus selbs Judam hat müssen vnter seinen Aposteln leiden / Welches thut jzt den Christen wehe / das sie müssen bleiben mitten vnter den vnschlachtigen / verkereten bösen Leuten in der Welt / welche ist des Teufels Reich.

Phillip. 2.

Trost der  
leiden Chri  
den in alle  
frem leiden  
auff Erden  
dieses  
künfftigen  
tages des  
Gerichts.

Aber sie haben hie auch den trost (wie den Chri in alle frem leiden auff Erden) dieses künfftigen tages des Gerichts / da Christus wird solche sonderung mache / zwischen jnen vñ dem andern hauffen / Das darnoch keine falsche böse Menschen / ja auch weder Teufel noch Tod / sie werden nimmermehr rüren / noch anfechten können.

Da wird er denn das vrtail sprechen / welches er allbereit hiemit gefasset vnd gestellet / wie es lauten sol / vnd gewislich nicht wird geendert werden. Vnd lauret ja wunderbarlich / das er es eben

darauff stellet / vnd zu grund vnd vrsach desselben setzet / Das sie diese werck (so er hie erzelet) gethan / oder nicht gethan haben etc. Vnd machet eine lange entschuldigung / beide dere / so sie gethan / vnd nicht gethan haben etc. Welches doch alles wird in einem augenblick geschehen / Denn da werden aller menschen hertzen für allen Creaturn offen stehen / Vnd wie es hie gepredigt wird / so wird es dort so bald alles ausgericht sein.

**N**u möcht man wol fragen / Warumb Christus eben die selben werck allein werck der Barmhertzigkeit / oder dagegen der vnbarhertzigkeit (der man aus diesem Text hat sechserley gezelet / wiewol je dergleichen viel mehr mügen genennet werden) welche doch (wenn man sol subtil dauon vrtailen) nicht mehr denn des einigen fünfften Gebots werck sind / Du solt nicht tödten / In welchem in gemein gebotet wird / wie es Christus selbs auslegt / das man nicht zürnen sol mit dem Liehesten / sondern im freundlich / dienlich / hülflich sein / vñ guts thun / wo ers bedarff / in hunger / durst / blöße / elend / gefengnis / Franckheit oder andern nöten / auch denen / die da haben vrsach gegeben zu zorn oder vnbarhertzigkeit / vnd scheinen der liebe vnd wolthat nicht werd sein / Denn das ist ein schlechte tugent / das man denen guts thut / die man sonst lieb hat / oder widerumb von jnen wolthat vnd danckbarkeit hoffer.

Werck der  
Barmherzigkeit  
auch  
in den  
andern  
Geboten.

Man möcht aber / wie gesagt / zu solchen wercken der Barmhertzigkeit auch wol viel mehr aus den andern Geboten rechnen / Als aus dem sechsten / das einer dem andern helffe / sein Weib / Kind / Gevatter / bey suchet vnd ehren behalt / Item aus dem siebenden / achten vnd letzten / des Liehesten gut vnd habe / haus / hof / gut gerücht helfen retten vñ erhalten / Item / die armen / verdrückten / beweltdigten schützen vnd beystand thun etc.

**W** sprichet ja Christus Matth. 12. das die Menschen nicht allein dauon / das sie diese Gebot vbertreten / sondern auch von einem jeden vnnützen wort / so sie geredt haben / werden müssen rechnen / schaffte geb. Item / wo bleiben die werck der ersten Tafel vnd höchsten Gebot / als / rechte leren / glauben / beten / Gottes Wort hören / surdern vnd dergleichen.  
Warumb

Frage war  
umb Chri  
stus eben die  
werck des  
fünfften Ge  
botts an  
zeucht.



Warumb fället er so scharff vnd streng Gerichte / allein vber die / so diese werck des fünfften Gebots nicht gethan / welche doch fast scheinen solche werck / so auch wol die Heiden thun.

Wie denn die Türcken von solchem werck mehr rühmen vnd vnter jnen treiben / denn vnter vns / die Christen heissen / geschiet / Denn jrer jglicher den andern helt für seinen Vender / vnd jm mittheilet was er hat / Das sie es auch für die grösste vntrew vnd schendlichste vntugent halten / wo einer ein stück Brots in hungers not / nicht mit dem andern teilet / Wie hebt er denn eben diese werck so hoch / so auch bey Türcken vnd Heiden leuchten? Er wird je das nicht sagen / das die Vnchristen mit solchen wercken das ewige Leben verdienen.

Denn das er redet von den wercken der gleybigen Christen / zeiget er selbs damit / so er spricht / Ich bin hungerig gewesen etc. vñ jr habt Mich gespeiset etc. Item / Was jr gethan habt einem vnter diesen meinen geringsten Brüdern / das habt jr Mir gethan. Denn das ist kein zweifel / das / wer da solche werck der Barmherzigkeit an den Christen vben sol / der mus selbs auch ein Christen vnd gleybig sein / Wer aber an Christum nicht gleybt / der wird gewislich auch keinem Christen so hold sein / viel weniger Christo selbs / das er vmb seinen willen seinen Armē / dürffigen etc. solt barmherzigkeit erzeigen / Darumb wird er auch solches für Gericht anziehen / vnd zu beiden teilen darnach das vrtail fellen / welche solche werck gethan oder nicht gethan haben / als öffentlich zeugnis der fruchte jres Glaubens / vnd jres vnglaubens.

Es lautet gleichwol / als wolle er hies mit zeigen / das viel vnter den Christen nach der empfangenen Predigt des Euangelij / von Vergebung der Sündē / vñ gnade durch Christum / hernach auch erger werden / weder die Heiden / Denn also sagt er auch Matth. 19. das viel die da sind die ersten / werden die letzten / vnd die da sind die letzten / werden die ersten sein etc. Also wird sichs auch allhie am ende finden / das die / so da solten rechte Christen sein / weil sie das Euangelium gehört / die sind viel erger vnd vnbarmerziger worden / wedder zuvor / Wie man jzt solches sithet für augen / allzu stark erfüllt.

Zuor / wo man solt vnter des Pape thums versörung vnd falschen Gottes diensten gute werck thun / da war jederman bereit vnd willig / vnd kund etwo ein Fürst oder eine Stad grösser vnd reicher Stiffung vñ Almosen geben / weder jzt alle Könige vnd Keiser vermochten / Jzt hat dagegen alle Welt nichts anders gelernet / denn nur schagen / schinden / vnd öffentlich rauben vnd stelen / durch liegen / triegē / wuchern / vberheuren / vbersetzen etc. Vnd jederman gegen seinem Nehesten handelt / als halte er nicht in für seinen freund (viel weniger für seinen Bruder in Christo) sondern als seinen mörderlichen feind / vnd nur allein gerne alles wolt zu sich reißen / vnd keinem andern nichts gönnet.

Das gehet teglich / vnd nimet on vnterlas vberhand / vnd ist der gemeinste breuch vñ sitte in allen Stenden / vnter Fürsten / Adel / Bürger / Bawren / in allē Höfen / Stedten / Dörffern / Ja / schier in allen Heusern. Sage mir / welche Stad ist so stark oder so from / die da jzt möchte so viel zusamen bringen / das sie einen Schulmeister oder Pfarherrn erneeret? Ja / wenn wirs nicht zuvor hetten aus vnser Vorfaren milden Almosen vnd Stiffungen / so were der Bürger halben in Stedten / des Adels vnd Bawern auffm Lande / das Euangelium lengest gerilget / Vnd würde nicht ein armer Prediger gespeiset oder getrencket.

Denn wir wollens auch nicht thun / Sondern nemen vnd rauben dazu mit gewalt / was andere hiezū gegeben vnd gestiffet haben / Darumb ist vns gar nicht dafür zu dancken / das noch ein Predigstuel oder Schule erhalten wird / Ja / wie viel sind vnter grossen / gewaltigen / reichen (sonderlich des Pape thums) die da nichts liebers sehen / denn alle Prediger / Schulen vnd Künste ausgerottet?

Also schendlich böse müssen die Leute werden zur letzten zeit / zu danck dem lieben Euangelio / dadurch sie von dem gefengnis vnd plage des Pape thums nu sind frey worden / Das sie nu nicht mehr menschlicher / sondern Teufelischer weise vnbarmerzig / nicht gnug daran haben / das sie gleichwol des Euangelij noch geniessen / dauon fett werden / mit rauben vnd stelen der Kirchen güter / Sondern müssen auch dencken /

Da v so viel

Werck der Barmherzigkeit thut niemand / denn ein Christen.

1. Erste / vrsach / Das viel / so das Euangelium gehabt / erger werden denn Heiden vnd Türcken.

Jztige vñ danckbarkeit gegen dem Euangelio.

Kirchen vñ Schulen werden durch vnser Vorfarn mildigkeit noch erhalten.

Teufelische vnbarmerzigkeit der Welt.



## Auslegung des Euangelij

so viel an jnen ist/ das Euangelium vol-  
lend gar aus zu hungern. Man zeile vnd  
rechne es an den fingern / hie vnd an-  
derswo/ was die dazu geben vnd thun/  
so des Euangelij geniessen/ ob nicht vn-  
ser halben / die wir jzt leben/ schon len-  
gest kein Prediger / kein Schüler mehr  
were / das auch vnser Erben vnd nach-  
kommen nicht wissen köndten/ was wir  
geleret oder geglaubt hetten.

Schrecklich  
verdammis/  
dere/ so die-  
se verma-  
nung Chri-  
sti verach-  
ten.

Was (meinstu) wird in kurz an dies-  
sem Tage / Christus auff seinem  
Richtstuel zu solcher vnchristlicher vn-  
barmhertzigkeit sagen? Lieber hörestu/  
du hast auch ein Christen wollen heis-  
sen/ vnd dich des Euangelij gerühmet/  
hastu nicht auch diese Predigt gehöret/  
so ich selbs gethan/ vnd dich gewarnet/  
wie mein Gericht vnd Vrtail lauten  
solt / Gehet hin jr verfluchten etc. Ich  
bin hungerig / durstig / nackt/ krank/  
elend vnd gefangen gewesen / vnd jr  
habt mich nicht weder gespeiset/ getren-  
cket/ bekleidet/ beherbergt noch besucht?  
Warumb hastu das verachtet/ vnd bist  
dazu schendlicher vnd vnarmhertziger  
worden/ gegen deine eigene Brüder/ we-  
der kein Türck noch Heide?

Winestu dich zu entschuldigen/ so  
du als denn wilt furwenden / HERR/  
wenn hab ich dich gesehen hungerig  
oder durstig etc. Denn da wird er dir  
wider sagen/ durch dein eigen gewissen/  
Lieber/ sind denn keine Leute gewesen/  
die dir gepredigt haben/ Oder etwo ar-  
me Schüler / die da hetten sollen lernen  
vnd zu Gottes Wort erzogen werden.  
Oder sonst verfolgete/ elende arme Chri-  
sten / die da weren zu speisen / zu tren-  
cken/ zu kleiden/ zu besuchen gewesen?

Vnser vor-  
farn Exem-  
pel/ ver-  
dampt vn-  
ser vndanck-  
barkeit.

Sollen wir doch billich vns sches-  
men fur vnsern Eltern vnd vorfaren/  
Herrn vnd Königen / Fürsten vnd an-  
dern / die so reichlich vnd mildiglich ge-  
geben/ auch zum vberflus / zu Kirchen/  
Pfarrern/ Schülern/ Stifften/ Spitaln etc.  
Des doch sie vnd ire nachkommen nichts  
ermer sind worden. Was würden sie ge-  
than haben / wenn sie die liecht des  
Euangelij gehabt hetten / so vns gege-  
ben ist? Wie haben im anfang die lieben  
Apostel vnd die iren / ire güter zusamen  
getragen / fur ire armen Widwen/ vnd  
die / so da nichts hatten / oder veriaget  
verfolget worden / damit niemand bey  
jnen noc leiden muste? Wie denn allzeit

die arme Christenheit sich selbs zusamen  
erneeren mus / Sonst ist/ wie ich gesagt  
habe/ so viel der ander hauffe dazu thut/  
beide/ Euangelium / Predigstuel / Kir-  
chen vnd Schulen schon zu grund aus-  
gerotret.

Was das noch eine gnade ist/ wo  
Gott etwo einen fromen Fürsten oder  
frome Oberkeit gibe / die da etwas er-  
halten / was noch der bröcklin vberig  
sind/ das es nicht alles zu grund weg ge-  
rissen wird von den andern G. eiffen vnd  
Geyren / Reubern vnd Dieben / Denn  
one das die arme Pfarherr vnd Prediger  
nicht allein erhungert/ sondern auch er-  
mordet weren / Denn es sind auch jzt  
kein arme Leute mehr / weder solche/ so  
der Kirchen dienen/ oder noch zu dienen  
aufferzogen werden/ vnd sonst keine nar-  
rung haben können/ vnd ire armen Weib  
vnd Kindlin nach jnen lassen / welche  
auch der Welt halben / müssen endlich  
hungers sterben / Sonst ist alle Welt  
vol vnntüger / vntreuer böser buben/  
vnter Tagelönern/ faulen handwerkern/  
Knecht/ Megden / vnd des müßigen  
faulfressigen bettel volcks / welche als  
lent halben nach alle irem murwillen  
vnd trutz/ vngestraft / den andern rech-  
ten armen/ jr schweis vnd blut abliegen/  
triegen/ rauben vnd stelen.

Was sage ich darumb / das wir se-  
hen/ wie Christus am Gerichte solchen  
falschen lügnern vnd heuchlern vnter  
den Christen wird auffrücken / vnd sie  
fur allen Creaturen vberweisen/ verdam-  
nen/ das sie der werck keines gethan / so  
doch die Heiden thun gegen den iren/  
Welche doch bey irem falschem/ irrigem  
Gottesdienst viel mehr gethan / vnd  
noch viel williger würden gethan ha-  
ben/ wo sie es besser gewust hetten.

Wo nu solch schrecklich verdammis/  
wie billich / vber diese gehen wird / Er-  
schreck-  
lich vrtail/  
so diese werck nachgelassen/ Wo wöllen vber die / so  
die bleiben/ so nicht allein haben die sel-  
ben lassen anstehen/ Christo in seinen ar-  
men nichts gegeben noch gedienet/ son-  
dern sie auch beraubt/ des/ so sie gehabt/ auch verfol-  
get.  
zu hunger/ durst/ bloße gezwungen/ vnd  
dazu verfolget / veriaget / gefangen vnd  
ermordet haben? Die sind so gar vnwis-  
der sprechlich böse/ vnd so tief zur Hellen  
grund verdampft / mit dem Teufel vnd  
seinen Engeln / das er auch nicht jr ge-  
dencken noch von jnen reden wil.

Wer



Aber gewislich wird er solcher Reu-  
ber/Tyrannē vnd Bluthunde nicht ver-  
gessen/Gleich wie er gewislich auch dere  
nicht vergessen/nach vnvergolten lassen  
wird/welche selbs haben hunger/durst/  
blöße / verfolgung etc. sonderlich vmb  
Christi vnd seines Wortes willen/gelids  
de/Wiewol er doch auch hiemit jr nicht  
vergisset/ob er wol zu denen redet / die  
sich solcher erbarmet haben/vnd jnen ge-  
holffen/Sondern sie gar hoch vnd herr-  
lich preiset/so er spricht/Was jr gethan  
habt einem vnter diesen meinen gering-  
sten Brüdern/das habt jr mir gethan 2c.

Christi Brē  
der/so vmb  
seinen willen  
hunger lei-  
den.

Schrecklich  
vrtail vber  
die Bepsti-  
schen Got-  
tes Diebe vñ  
Kirchen rau-  
ber.

Sie mügen furnemlich wol erzittern  
für diesem schrecklichem vrtail / vnser  
grosse geistliche Prelatē/ wie sie sich nen-  
nen/Bapst/ Cardinel/Bischoue/Thum-  
herrn / Pfaffen/ vnd das ganz Teuffels  
geschmeis des Lndechristischen hau-  
ffen zu Rom/vnd allenthalben anff jren  
Stiftē vnd Hurheusern (wenn sie nicht  
so gar verstockt vñ fursertiglich mit leib  
vnd seel dem Teuffel ergeben / vnd nach  
dem Hellschen feur rängen vnd eilten)  
Welche gar nichts anders dencken noch  
thun/denn als seien sie dazu gesetzt / das  
sie der armen Kirchen / alles was jr ge-  
höret/ aus jrem rachen reißen/ vnd auff  
aller schendlichst vnd lesterlichst/was zu  
erhaltung der Predigstule/Schulen vnd  
armer Leute gegeben/zu alle jrem mut-  
willen verzeren / verprangen / verbrast  
sen/ verschwelgen/verspielen/ verhuren  
etc. vnd Gott vnd der Leute dazu spot-  
ten (wie S. Petrus 2. Pet. 3. von jnen sa-  
get) ja/ darob auch öffentlich vnschül-  
dige frome Leute ermorden.

Ja/weh vnd abermal (vnd ewiglich)  
wehe jnen/vnd allen/die es mit jnen hal-  
ten/Denn es were jnen besser (wie Chris-  
tus von Juda sagt) das sie nie geboren  
wären/Vnd dafür soltē wündschen vnd  
wollen/das sie jre Mutter im ersten Ba-  
de ersuffet hette / oder in Mutter leib  
blieben wären/weder das jr einer/Bapst  
Cardinal / oder Bepstischer Pfaff ist  
worden/Denn es sind doch nichts an-  
ders/weder eitel verzweinelte/aufferlese-  
ne/ nicht Strassen oder Gassenrenber/  
sondern öffentliche Landreuber / nicht  
der grossen/gewaltigen (die es wol ha-  
ben) sondern der armen vnd elenden/  
Pfarkirchen/Schulen/Spitaln / denen  
sie jren bissen aus jren zeenen / vnd jren  
trunck für dem maul hin weg reißen/

das sie sich nicht können bey leben erhal-  
ten.

Darumb hüte sich nur jederman für  
Bapst/Bischoff vnd Pfaffen stand/ als  
für denen / die da schon lebendig in ab-  
grund der Hellen verdampft sind. Es ist  
fürwar nicht vergeblich/das S. Paulus  
geweissagt hat/das anffs letzte würden  
sein grewliche vnd schrecklichen zeiten/  
Denn es gehet doch alle welt so sicher da-  
hin/vnd achtet solch schrecklich vrtail  
nichts/so sie höret schon beschlossē vber  
solche vnbarmerzige Reuber / Diebe  
vnd mörder der armen Christen/Vnd al-  
lermeist vber die/ so da Christē sein sollen  
vnd nach der empfangen gnade/bald wi-  
der zurück fallen/vnd wie der Hund/ wi-  
der fressen/was sie zuvor ausgeworffen/  
vnd wie die Saw wider in jren Kot sich  
welzen/Vnd also aus dem ersten (ehe  
man sich vmbsehē) die letzten werden.

**D**Je ander vrsach / darumb er eben  
sonderlich diese werck der barmher-  
zigkeit/vnd vbertretung dersel-  
ben/aus dem fünfften Gebot anzeucht/  
ist diese/Das er wil vns erinnern/so Chri-  
stē beruffen sind/ vnd haben barmherzig-  
keit empfangē/durch vnsern **J. E. X. X. V.**  
erlöset von Gottes zorn/ vnd der verda-  
mnis des fünfften Gebots vnd ewigen  
Tods / vnd dafür haben einen gnedigen  
Gott/der vns alles guts thut / zeitlich  
vñ ewiglich/Das wir dieses nicht allein  
vns zur erlösung/sondern auch zu einem  
Exempel gethan/ansetzen vnd vns für-  
bilden/Das weil er vns solche Barm-  
herzigkeit erzeigt/das wir nicht an leib  
vnd seele verlorn sind/So sollen wir ge-  
gen vnserm Liebesten auch also thun/  
auff das wir nicht wider das fünffte Ge-  
bot handeln/welchs eigentlich die Lie-  
be vnd Barmherzigkeit fordert.

Vnd sollen solchs thun/nicht allein  
vmb des gebots willē/ vnd dreyen des  
Gerichts/Sondern vmb des Exempels  
willen der trefflichen hohen güte / so er  
vns erzeigt / Denn dis Exempel müs-  
dennoch nicht on fruchte sein (wie auch  
sein werck der erlösung nicht one krafft  
vnd frucht ist) Ob wol der meiste hauff  
nach dem Euangelio erger wird / So  
müssen doch etliche sein/die beides recht  
fassen/vnd dabey bleibē/Denn er spricht  
ja/das er wil zween hauffen machē vnd  
scheiden/Darumb müssen ja auch frome  
sein/die dis Gebot gehalten haben.

37e

2. Timo. 3

2. Pet. 1

2  
Gottes  
barmher-  
zigkeit/bei-  
de/zur erlö-  
sung vñ zum  
Exempel  
vns fürgebil-  
det.



## Auslegung des Euangelij

**W**ie siehst du zu / das du siehest bey den / die da umb Christi willen hie gütig vnd barmherzig sind (oder selbs leiden) So kanstu mit freuden des Jüngsten tages erharren / vnd darffest dich nicht für dem Gerichte fürchten / Denn er hat dich albereit eraus gezogen / vnd geordnet vnter die / so zu seiner Rechten stehen sollen.

Christen sollen sich von herten freyen des Jüngsten Gerichts.

Denn wir / so Christen sind / sollen ja des hoffen / vnd von herten begern / das dis Gericht kome / Wie wir denn auch darumb bitten / Dein Reich kome / vnd dein wille geschehe. Erlöse vns von dem bösen etc. Auff das wir den frölichen lieben Spruch hören / Kommet her jr Gebenedeieten in meines Vaters Reich.

Der Christe leiden vber der Hoffnung des Gerichts.

Dieses vrtail gewarten wir / Denn wir ja auch darumb Christen sind / vnd eben umb dieser hoffnung willen so hart gedrückt werden / erslich vom Teuffel vnd vnserm eigen fleisch / welche vns nicht lassen gleuben vnd frewen / Dar nach auch von der Welt tyranny vnd feindschafft / Vnd müssen allenthalben sehen vnd hören den mutwillen / so der Teuffel vnd Welt treiben wider das Euangelium / vnd so viel jamers auff Erden / das wir ja solten dieses lebens müde werden / vnd schreien / Kom lieber HERR / Kom / vnd erlöse vns.

Solche herten werden ja gewislich sein / die des Richtstuels Christi frölich vnd mit gutem gewissen gewarten / Denn sie ja in dem stand vnd gemeinschafft sind / dere / die an Christum gleubē / vnd die fruchte des Glaubens beweisen / durch liebe vnd guthat gegen den Armen / oder gedult / so sie mit denselben leiden. Denn wie ich gesagt habe / Wer den glaubē nicht hat / der wird die werck der barmherzigkeit an den Christen nicht thun / Wer sie aber thut / der thut sie daher / das er gleubt / er habe einen trewen Heiland vnd Erlöser an Christo / der in mit Gotte versönet / Darumb mus er auch ein gütig / freundlich hert haben gegen seinen Nehesten (auch seinen feinden) vnd inen dienen / wo er sie siehet not leiden. Ja / er leidet auch selbs (wie jzt gesagt) was in vber seinem Glauben widerferet vom Teuffel vnd der Welt.

Wer nu also gefinnet ist / (sage ich) der sey nur frölich vnd guts mües / Denn er hat schon hinweg das selige / fröliche vrtail / Kom her du gebenedeiter / etc.

Denn du bist auch einer gewesen / meiner geringsten Brüder / die daselbs hunger vnd durst gelidten / oder je den andern hungerigen vnd durstigen etc. gedienet haben vnd barmherzigkeit erzeigt / wie ich dir gethan habe.

frölich vnter die Christen / Kommet her jr Gebenedeieten etc.

**I**he / also ist schon in diesem leben die vnterscheid gemacht / beide der Schafe vnd Böcke / das es ein jeder wol kan bey im selbs gewar werden / vnd mus sich auch auswendig spüren vnd merken lassen.

Denn die da nicht den glaubē haben / die thun gewislich der keines / tröste sich weder der gnaden Christi / noch gedensken barmherzigkeit zu oben / Gehen also / beide für Gottes wort vnd irem Nehesten hin / als sehen vnd hören sie nichts / Wollen nichts davon wissen / das der HERR sey / dem sie damit dienen solten / vnd er solches von inen fordern werde / Denn wenn sie daran gedachten / das sie sterbē / vnd für diesem Richtstuel müssen / so würden sie freilich ja zu der zeit niemand umb keinen heller vnracht thun / Aber dafür ist gut / das sie den Tod aus den augen setzen / vnd ir hert nimer daran gedencket.

So blind vnd verstockt ist die welt / so sie für augen siehet / was für ein großer hauffe aller menschen vor ir gestorben / vnd teglich nebē jr dahin stirbet / wil sie es doch mit sehenden augen nicht sehen noch achten / sondern getrost vnd frisch dagegē forferet in irer bosheit. Item / da sie hören / wie schrecklich Gericht vnd verdammis vber sie gehē wird / noch wil sie / weder des trosts noch des Exempels Christi achten / vnd dafür alle vnbarms herzigkeit vber / Vnd also schlecht dar nach strebt / vnd nichts anders habē wil denn das sie das grewliche vnd vnwiderruffliche vrtail höre / für dem Richtstuel Christi / vber sich gehen / vnd so bald dar auff von seinem Angesicht ins ewige Zellische fewr geworffen werde.

Der Welt verstockung

Wolan / wer zu bekeren ist / vnd in wil sagen lassen / der hat hie mit gnug / beide / das in schrecken vnd warnen / da zu reizen vnd locken sol / Das er / weil die zeit da ist / sich also drein schicke / nach Christi wort vnd Exempel / das er nicht mit der Welt das schreckliche Gericht hören müsse / sondern mit den fromen Christen auch der barmherzigkeit sich frewen vnd trösten möge.

Denn



Erste ver-  
manung  
Christi.

Denn auch Christus selbs diese erste vermanung seinen Aposteln nicht gespart hat/da er spricht Luc. 21. Hütet euch/das ewre hertzen nicht beschweret werden mit fressen vnd sauffen/vnd sorgen der narung (welches er zeiget / das am ende der Welt am höchsten werde vberhand haben)vnd dieser Tag schnelle vber euch kome etc. Sondern seid alle zeit warcker/ vnd betet / das jr würdig werden müget zu entfliehen diesem allen/das geschehen sol/vnd zu stehen für des Menschen Son etc.

Ercke aber/wie ich angefangen habe zu sagen/das er dennoch auch wil die guten werck seiner Christen vnterscheiden von den Türckischen vnd Heidnischen wercken/Weil er redet von solchen wercken / die jm geschehen/ Davon sie doch zu beiden teilen nicht wollen wissen/vnd die Gottlosen sich auch entschuldigen/das sie in nicht gesehen haben etc.

Wer das  
fünffte Ge-  
bot recht  
halte.

Aber er hat hiemit das fünffte Gebot recht wol ausgelegt / das es heisset/wer es thut (das wird niemand sein/denn ein gleybiger Christen) der hat es Christo gethan/wie er auch das Weib/so jm sein heubt vnd füsse salbet Matthei 26. preiset / das sie es erfüllet habe/vnd spricht/Sie hat ein gut werck an Mir gethan / Denn andere armen habt jr allezeit bey euch / vnd wenn jr wollet/könnet jr inen guts thun/ Mich aber habt jr nicht allzeit. Warlich / ich sage euch/ wo das Euangelium gepredigt wird in der ganzen Wele/ da wird man auch sagen zu jrem gedechtnis/was sie gethan hat. Item/ Wer einem / der geringsten/so an Mich glauben / einen trunck kaltes wassers gibe / dem sol es nicht vnbelohnet bleiben.

Das solten wir ins hertz schreiben vnd bedencken/welch ein gros trefflich werck es ist/einem Christen guts thun. Vnd widerumb auch/was es ist / einem Christen leid thun/Wie ich gesagt habe von Papsst/Bischouen / Tyrannen vnd Junckhern/welche Christo von seinen füssen nemen/das sie jm nicht gegeben haben/speise/ tranck / herberg vnd narung der armen/ so vmb Christi willen arm sein müssen/Wie sie sind (als Prediger / Kirchendiener/Schulmeister etc.) nicht in solchem stand/ so die Welt zu regieren hat / noch mit andern hendlen

Die/so der  
Kirchen die-  
nen/ müssen  
der Welt  
arm sein.

vmbgehen können/damit sie auch möchten ire narung erwerben / Sonst neme man sie auch mit in die Regiment / vnd gebe inen gnug / Weil sie aber damit nichts zu thun haben / so gibt inen die Welt auch nichts vmb iren verdienst/ Vnd wo man inen nicht vmb Gottes vnd Christi willen gibt / so müssen sie nichts haben / vnd arme elende Widwen vnd Waisen nach inen lassen.

Denn die in andern Stenden vnd Emptern sind / vnd so sonst reichlich gnug haben/wollen vnd können nicht/ der Kirchen Empter vnd dienst pflegē/ habens auch nicht gelernet. Widerumb solten auch Pfarherr vnd Prediger sich weltlicher hendel vnd Regiments annehmen/ so tretten sie aus jrem befohlne Ampt/Darumb müssen sie erneeret werden (sollen sie auch zu essen haben) von dem Bettelstab/dauon Christus hie sagt/Macher in aber so köstlich/das/wer deren einen speiset oder trencket/ als seine fusse/vnd geringste verachteste glied masse auff Erden / das wil er nicht anders/denn jm selbs gethan vnd gegeben/ erkennen.

Wollen wir nu Christen sein / vnd der hohen ehren von Christo gewarten/das wir für allen Creaturn gerühmet/ vnd vns vergolten werde/so müssen wir warlich auch vnuerdrossen sein / solchen vmb sonst zu geben / die sonst / weil sie kein Recht zur Welt haben / auch vmb sonst jr Ampt thun müssen/Damit nicht vber vns gehe der Fluch vnd zorn / das wir vns vnser armen Brüder/ so vns zu gut in der Welt haben hunger / durst/ elend/gefengnis müssen leiden / das sie vns zu Christo brechten/nicht haben erbarmen wollen.

Wie gehet aber das zu / das die Gerechten solchs nicht erkennen vnd wissen / das sie Christo solches gethan haben? Wie sie sprechen / HERR/ Wenn haben wir dich gesehen / hungerrig oder durstig etc? Freilich darumb/das es zu gar gering ansehen hat / das dis solt für Gott so köstlich sein / was man etwo einem armen Pfarherr / Caplan/Schulmeister / Cüster / gibt. Ja/ die Welt helt es für eitel verloren gelt/ Vnd mus doch jederman sagen / Wenn kein Predigstuel / Schulen/ Spital gehalten würden/was were die Welt reicher?



## Auslegung des Euangelij

cher? oder was ist sie jzt beste ermer?  
 On das sie lauter Heiden weren / oder  
 müßten / wie bisher / ins Teuffels namen  
 denen gnug geben / vnd sich bis auff den  
 grad schinden lassen / die sie umb leib  
 vnd seel betrogen.

In gar ge-  
 ring anse-  
 hen / des / so  
 man Christo  
 gibt.

Summa / Es ist ja das aller wenigst  
 vnd geringst / das Kirchen vnd Schulen  
 von der Welt kriegen / Noch machet  
 es so scheel augen / vnd beschweret sie  
 hoch / das sie allein darüber schreien /  
 was dieselben haben / dazu sie doch selbs  
 nichts oberall geben / das sie es viel bes-  
 ser angelegt halten / wo sie sonst hundert  
 mal so viel vnverschampren / losen  
 Lotterbuben / Geucklern geben / Ja wol  
 ehe können vergessen / was sie Bruder  
 Weiten mit gewalt müssen rauben vnd  
 nemen lassen / vnd dazu jnen die haut la-  
 ssen vol schlagen / So gar gehets der  
 Welt nicht ein / das sie solt glauben oder  
 gedencen / das es heisse Christo selbs ge-  
 geben / Ja wir können auch selbs nicht  
 also ansehen.

Aber er kan hie von reden vnd vr-  
 teilen / vnd weis / was daran gelegen ist /  
 Denn man kan je sonderlich die Jugent  
 nicht auffziehen zu Gottes Reich / denn  
 durch die Schulen / noch Gottes wort  
 erhalten / on durch Predigstüle / Wo  
 man nu die leste vntergehen / da mus  
 wol eitel Sodom vnd Gomorra wer-  
 den / vnd solchen auch also gehen / wie es  
 jr gieng / da sie Gottes wort von sich ge-  
 worffen / vnd den fromen Loth nicht  
 mehr hören noch leiden kundren.

Straff vber  
 Sodom vnd  
 Jerusalem /  
 vnd verach-  
 tung Got-  
 tes worts.

Wie auch der Prophet Ezech. xvi.  
 vber Jerusalem weissagt / So war ich le-  
 be / spricht der Herr ZELRR / Sodom  
 deine Schwester sampt jren Töchtern  
 hat nicht so gethan / wie du vnd deine  
 Töchter / Sie / das war deiner Schwes-  
 ter Sodom missethat / Hochmut / vnd  
 alles vol auff / vnd guter friede / den sie  
 vnd ire Töchter hatten / Aber dem Ar-  
 men vnd Dürfftigen hetten sie vngerne  
 die hand gereichet / sondern waren stolz  
 vnd theten grewel fur Mir / Darumb  
 ich sie auch weggethan habe / da ich be-  
 gund drein zu sehen etc.

Eben also stehets jzt auch allent-  
 halben / da jederman / Bawr / Bürger /  
 Adel / samlet nur viel Taler / scharret  
 vnd geizt / frisst vnd seufft / treibt allen  
 trog vnd mutwillen / gerade als were  
 Gott lauter nichts / vnd sich niemand

des armen Christi mit seinem Bettels-  
 stab annimet / sondern dazu vnter die  
 füsse tritt / Bis auch bey vns / eben wie  
 zu Sodom vnd Gomorra aller gehorsam /  
 zucht vnd ehre vnter gehet (weil  
 kein vermanen vnd predigen nicht hel-  
 ffen wil) vnd so gar vbermacht / das es  
 nicht also stehen kan.

Ich weissage von hertzen vngerne /  
 denn ich oft erfahren / das es allzu war-  
 worden / Aber es stehet ja leider allent-  
 halben also / das ich sorgen / vnd nu schier  
 mich darein ergeben vnd verschmerzen  
 mus / es werde Deudschland auch gehen /  
 wie es Sodom vnd Jerusalem gangen  
 ist / vnd Deudschland gewest sein / Es ge-  
 schehe durch Türcken / oder (oder wo  
 nicht bald der Jüngste tag drein schles-  
 get) durch sich selbs in einander falle /  
 Denn es ist so gar vbermacht vnd vber-  
 böset / das es nicht erger werden kan /  
 Vnd ist noch ein Gott / so kan er es vnge-  
 straffe nicht lassen.

Schreckli-  
 che weiffa-  
 gung vber  
 Deudsch-  
 land.

Ob nu die Welt solches nicht achten  
 noch wissen wil / das sie müsse sterben  
 vnd fur Gericht stehen / sondern wider  
 die erkandte warheit tobet. So lasset  
 vns doch solchs zu ohren vnd hertzen ne-  
 men / das vns Gottes zorn nicht auch  
 mit hinreisse. Denn was sol auch Gott  
 anders dazu thun / er mus beide / Türckē  
 vnd Teuffel vber vns raum lassen / Denn  
 das der Türck gethan vnd noch thut /  
 das mus er wol lassen / wenn wir nicht  
 so gar in vnbusfertigkeit vnd verstock-  
 ung verhartet / vnd zur straffe so garhat.  
 vberreiff weren / Aber das thut es / das  
 wir so lesterlich gegen Gottes wort vnd  
 angebotene hilfße toben / vnd dazu noch  
 wider den Türcken trogen.

Der Türckē  
 glück vmb  
 vnser ver-  
 stockte bos-

Vnd ich halte / wenn wir Luthes-  
 rischen (wie sie vns nennen) nur tod we-  
 ren / so würde so bald alle Welt schon ge-  
 wonnen schreien / als hetten sie alle Tür-  
 cken bis auff einen auffgefressen / Aber  
 es sol jnen als denn auch gehen / das je  
 hundert von einem Türcken geschlagen  
 werden / Vnd wenn das Jetergeschrey  
 angehet / wie jemerlich der Türcke die  
 Leute / Kind / Weib vnd Man zurha-  
 cket / so wollen wir als denn auch erst  
 schreien vnd klagen.

Aber es mus also sein / das wir thun /  
 wie die Jüden / vnd nur diesen Chris-  
 stum hinwegrichten / Wenn dieser ge-  
 creuzigt ist / so wollen wir dem Türcken  
 wol



wol raten / Gleich wie Juncker Caiphas vnd seine Jüden den Römern geraten haben / Vnd die Junckherrn zu Jerusalem meineten / wenn sie nur den Propheten Jeremiam tod hetten / wolten sie für dem König zu Babel wol sicher sein / Das geschach eben also / da sie Jeremiam in den Kercker worffen / Kam der König / vnd füret sie alle gefangen hinweg.

Also sehe ich auch / das Gott ein garn gesponnen vber Deudsch land / das eben jzt auch desselben wegs wil / mit seiner wissentlichen verstockung / trotz / bosheit / verachtung vnd vndanckbarkeit gegen dem lieben Euangelio / vnd wil Gott eine torheit schuldig sein / Die wird es auch redlich müssen bezalen. Gott gebe vnd erhalte vns vnd vnser armes heufflin / das wir mögen dem gewulichen Jormentstehen / vnd vnter denen erfunden werden / die den armen Christum ehren vnd dienen / vnd des Gerichts zu seiner Rechten frölich vnd seliglich erwarten / Amen.

### Zum Leser.

Wo es sich begeben / das vber diese xxvj. Sonntag noch einer vberleng were / (welches doch gar selten fursellet) so mag man die nehest vorgehende Epistel vnd Euangelium / auff den letzte XXVII. Sonntag sparen / vnd da zwischen des nehesten Sonntags zumor / folgende Text zur Epistel vnd Euangelio nemen.

### Epistel / 2. Pet. 3.

**W**o wisset das auff erst / Das in den letzten tagen komen werden Spötter / die nach iren eigen lüsten wandeln / vnd sagen / Wo ist die verheissung seiner zukunfft? Denn nach dem die Betet entschlaffen sind / b eibet es alles / wie es von anfang der Creaturen gewesen ist. Aber mutwillens wollen sie nicht wissen / das der Himmel vorzeiten auch war. Dazu die Erde aus wasser vnd im Wasser bestanden / durch Gottes wort / Dennoch ward zu der zeit die Welt durch dieselbigen mit der Sindsflut verderbet. Also auch

der Himmel isund vnd die Erde / werden durch sein Wort gesparet / das sie zum fawr behalten werden / am tage des Gerichtes vnd verdammis der gottlosen Menschen.

### Euangelium / Matthei 24.

**G**leich aber / wie es zu der zeit Nohe war / Also wird auch sein die zukunfft des Menschen Soms. Denn gleich wie sie waren in den tagen vor der Sindsflut / Sie assen / sie truncken / freieten / vnd liessen sich freien / bis an den tag / da Noe zu der Archen eingieng / Vnd sie achtens nicht / bis die Sindsflut kam / vnd nam sie alle dahin. Also wird auch sein die zukunfft des Menschen Soms. Denn werden zween auff dem Felde sein / Einer wird angenommen / vnd der ander wird verlassen werden. Zwo werden malen auff der müle / Eine wird angenommen / vnd die ander wird verlassen werden.

Darumb wachet / denn jr wisset nicht / welche stunde ewer HERR komen wird. Das solt jr aber wissen / Wenn ein Haus vater wüste / welche stunde der Dieb komen wolt / so würde er ja wachen / vnd nicht in sein Haus brechen lassen. Darumb seid jr auch bereit / Denn des Menschen Som wird komen zu einer stunde / da jr nicht meinet. Welcher ist aber nu ein trewer vnd kluger Knecht / den der Herr gesetzt hat vber sein Besinde / das er inen zu rechter zeit speise gebe? Selig ist der Knecht / wenn sein Herr kommet / vnd findet in also thun. Warlich / ich sage euch / Er wird in vber alle seine Güter setzen. So aber jener / der böse Knecht / wird in seinem herzen sagen / Mein Herr kommet noch lange nicht / vnd sehet an zu schlagen seine Mitknechte / isset vnd trincket mit den Trunckenen / So wird der Herr desselben Knechts komen / an dem tage / des er sich nicht versühet / vnd zu der stunde / die er nicht meinet / vnd wird in zuscheitern / vnd wird im seinen lohn gegeben mit den Heuchlern / Da wird sein heulen vnd zerknappen.

FINIS.



Was ist die grösste gesaffene, die kein Leib abgesehen, fol. 29.  
Was man die die absolution an die hant in hant macht, fol. 31. b.  
Von dem Vort Dinnung, ob die de filij die officii grade sig, fol. 32. a.

*[Faint, mostly illegible text in the left column, likely bleed-through from the reverse side of the page.]*

*[Faint, mostly illegible text in the right column, likely bleed-through from the reverse side of the page.]*